

Leeter ngada Hebøre hay Mey da ray Leeter ngada Hebøre hay

Leeter ngada Hebøre hay na, ndaw ma sèra mezøley nga ndaw ma wuzlala daa ba. Hebøre hay na, ara ndøhay Jøwif hay. Ndaw ma wuzlala leeter e keɗe a wuɗey nga vøltar gøɗaŋ ngada Jøwif hay masa ma tømara mey nga Yesu. A vøltar gøɗaŋ nga tøbey mey nga Yesu ma føna ma føna kwa ata daa banay.

Ndaw ma wuzlala leeter e na, a wuzda Yesu na, a fønta maslaŋ hay nga Gazlavay, a fønta ndøhay ma tøla mey nga Gazlavay zleezle, asaya, a føna Mawiz, maja aŋga na, Bøzey nga Gazlavay (fasølawal 1 haa 3). Asaya, a wuzda aŋga na, ndaw mahura da ray ndøhay ma ka kwakwas nga Gazlavay masa fara fara. A da njey ndaw ma ka kwakwas nga sørmataw. Aŋga ta vølda ray aŋga la dey pal nga møcey maja mebørey nga ndøhay tabiya. Anda keɗe, Yesu ta handawa Mejøwey-mey Mawiya la aa slam a nga Mejøwey-mey Magurma masa Gazlavay ma jøwa ta ndøhay aŋga hay ta fa Mawiz.

Ndøhay ma tømme mey nga Yesu na, ata daa cøved mawiya dømme. A gwamara nga søpey cøved magurma saba. Maaya na, a sørfadamata ndøhay masa zleezle ma pamara Gazlavay nga ndaw ata fara fara, ata masa ma høtam gøɗaŋ

daa cøved anga. (Nøka fasølawal 11.) Mey madagway-dakw daa leeter e na, ara mey da ray menjey nga ndøhay ma tøba mey nga Yesu. Si a njam maaya maaya daa mecømey-ray nga Yesu.

Daa leeter e kefe na, mey mekele mekele daha nga vøley gødan a ndøhay:

Mey nga Gazlavay aa ta gødan nga key sløra daa ndaw (4.12)

Mey da ray mejøwey-mey mawiya (8.8-13)

Mey da ray ndøhay zleezle ma pamara Gazlavay nga ndaw ata fara fara (11.1-12.13)

Nøkakwa dey na, si fa Yesu gway (12.2)

Mey da ray Yesu, ndaw ma wuzdørwa mewedey nga Gazlavay

¹ Zleezle na, *Gazlavay taa guzltar la ngada papan nga papa aløkwa hay dey ga ta cøved hay mekele mekele ta mey ndøhay ma tøla mey anga hay weewe.

² Ama wure kefe daa masa bøla gweegwe a ndøvey kefe na, taa guzlnakwar la ta mey Bøzey anga. Gazlavay a løma bøla ta slam da vad cøpa na, ta fa Bøzey anga ha, asaya, Gazlavay ta wala la nga wey da ray cek hay tabiya.

³ Ma wuzdørwa mewedey nga Gazlavay na, ara anga. Bøzey a na, a lawa Gazlavay kørad! Mey anga na, aa ta gødan. Ara ta mey anga ha aa ma kørza bøla ta slam da vad. Masa anga

1:2 1.2 Bøzey anga: 3.6; 5.8; **a løma bøla ta slam da vad:** Jan 1.2; Kwa 1.16; Heb 11.3

ma diytara cøved cay * a ndøhay amba a njam manjar mebørey fa mey nga Gazlavay na, ta', a tøpey a vad, a njeý ta har-zømay nga Bay Gazlavay ma wey da ray cek hay tabiya.

Yesu a fønta maslan hay nga Gazlavay tabiya

⁴ Bøzey a na, a fønta maslan hay nga Gazlavay. Mezøley masa Gazlavay ma vøldara na, a føna nga maslan hay a may.

⁵ Sørmara, Gazlavay ta løvar kwa ngada maslan anga pal:

«Kah na, Bøzey adaw,
døga tasana yah Papakw»

na, daa ba sølak. Asaya, taa guzley da ray maslan anga pal, a løvey:

«Yah na, Papaha,
anga na, Bøzey adaw,»
na, daa ba may.

⁶ Ama masa anga fa da slørdørwa Bøzey anga maa-mey-ndaw † a bøla na, taa guzley la, a løvey: «Akwar, maslan adaw hay tabiya, ragadamar!»

⁷ Da ray maslan anga hay na, aa guzley, a løvey: «Maslan adaw hay na, ara ndøhay ma ka sløra adaw hay.

* **1:3 1.3** ma diytara cøved cay: A wufey nga løvey Yesu a diytara cøved nga ndøhay na, ta fa memøcey anga fa hwadam mazlangalakaya. **1:3 1.3** 2Kwr 4.4; Kwa 1.15; **har-zømay:** 8.1 **1:4 1.4** Ef 1.21; Føl 2.9 **1:5 1.5** Ps 2.7; 2Sam 7.14; Mt 3.17; SNM 13.33; Heb 5.5 † **1:6 1.6** Bøzey anga maa-mey-ndaw: A wufey nga løvey Gazlavay anga ta bøzey hay mekele mekele na, køne ba, ama a wufey nga løvey Yesu fa wey da ray cek hay tabiya nga Gazlavay anda bøzey maa-mey-ndaw ma wey da ray cek nga papaha. Nøka 2.11-13; Kwa 1.15, 18, leý Rm 8.29. **1:6 1.6** Ps 89.28; 97.7

Ata anda memed, asaya, ata anda neneh nga awaw.»

⁸ Ama ngada Bözey anğa na, taa guzlar la, a løyey:

«Kah na, Bay Gazlavay, ka da zöma bay akah nga sərmataw.

Ka da wey da ray ndəhay akah hay ta cəved e.

⁹ Ka wudəy na, mekey cek ta cəved e, ba na, mekey cek ta zlabay ba.

Maja ngene, ya ta walaka la, yah, Gazlavay akah.

Ya taa səmdaka la,

asaya, ya ta vəlka gədan la

ma fəna nga ndəhay mekele masa akwar bama.»

¹⁰ Gazlavay aa guzley da ray Bözey anğa saya, a løyey:

«Bay Mahura, ara kah ma ləma bəla dəga daa mezley a.

Ara kah ma ləma slam da vad ta har akah.

¹¹ Cek hay a cəpa a ndəvam la, ama kah na, ka da njeý nga sərmataw.

Ahaw, cek hay a tabiya a da nəsam anda zana magurma.

¹² Ka da takwamata

anda ndaw ma tekwemey zana magurma.

Cek hay a cəpa, ka da mbədfdata

anda ndaw ma mbədfey zana manəskaya.

Ama kah na, ka da njeý kəne, ka fa da mbədfey daa ba,

kah daha nga sərmataw.»

¹³ Gazlavay aa guzlar ngada Bözey anğa, a ləvar:

«Sawa njeɣ ta har-zəmay aɗaw
 amba ya wakwa da ray ndəhay
 haa ta pas masa yah ma pata masa-gəra akah
 hay cay
 asi salay akah.»

Ama taa guzley anda ŋgene kwa ŋgada maslan
 anɣa pal na, daa ba səlak.

¹⁴ Kaa maslan hay ŋga Gazlavay na, wa hay
 wa? Maslan hay ŋga Gazlavay na, ara mesəfney
 hay ma ka sləra ŋga Gazlavay gway. Gazlavay fa
 slərdata ŋga jəney ndəhay masa ma da ləham.

2

Ya da rəskwa meɣ ŋga Gazlavay ba

¹ Gazlavay taa guzlndakwar la ta meɣ Bəzey
 anɣa. Anda keɗe, si ya wakwa vaw ma fəna ma
 fəna fa meɣ masa aləkwa ma cəndakwa ha, da
 daa ba na, ya zlanɣaɗakwa la aa cəved mekele.

² Meɣ masa maslan hay ŋga Gazlavay ma
 kadamara zleezle na, ta wuzwa la ara meɣ fara
 fara. Ndəhay masa ma rəsmara meɣ a, ma
 təbmara ba na, Gazlavay ta sərddata banay la
 təɗe fa mebərey ata ha.

³ Ama aləkwa na, aləkwa ta cəndakwa meɣ
 da ray meləhey la ma fəna meɣ masa maslan
 hay ŋga Gazlavay ma kadamara ha. Anda keɗe,
 da aləkwa fa rəskwa meɣ a, ya təbkwa ba na,
 ŋgene, ya da ləhkwa na, kwara? Ara Bay
 Mahura ta ray anɣa ma wuzda meɣ da ray
 meləhey a teesəɗ. Fa dəba ha, ndəhay masa ma

cəndamara mey a na, ta wuzdamandakwara la ara mey fara fara.

⁴ Gazlavay may, ta wuzda la ara mey fara fara ta fa gədan anğa leŋ ta fa maazla hay mekele mekele masa anğa ma kata. Asaya, Gazlavay ta vøltar gədan nğa Mesəfney anğa la a ndəhay nğa key sləra mekele mekele anda aa ma wufey.

Yesu a məcəy na, maja wa hay wa?

⁵ Yaa guzlam na, da ray menjey nğa ndəhay da bəla mawiya nğada fa mey. Daa menjey a na, Gazlavay fa da vøltar cəved nğada maslan anğa hay nğa wam da ray ndəhay daa ba.

⁶ Sasəkar jak, mawuzlalakaya daa dferewel nğa Gazlavay, a ləvey:

«Ndaw-magədan na, wa may wa
 amba kah, Bay Gazlavay, ka wulkey da ray a
 na!

Ndaw-magədan na, wa may wa
 amba ka nəkfar dey na!

⁷ Ka ta tərda la nğa mecəhe da ray maslan akah
 hay

nğa menjey nekədey,
 fa dəba ha, ka ta həlma la, ka ta həslar ray la
 anda bay.

⁸ Ka ta vøldata cek hay sem cəpa asi har anğa *.»
 Yaw, Gazlavay ta vøldata cek hay sem cəpa asi
 har nğa ndaw-magədan, kwa cek pal masa anğa
 ma wey da ray a ba na, daa ba. Ta ngene he cəpa

2:3 2.3 10.29; 12.25 **2:4 2.4** Jan 2.11; SNM 2.22; 1Kwr 12.4-11;
 2Kwr 12.12 **2:6 2.6-8** Ps 8.5-7 * **2:8 2.8** asi har anğa: Ta mey
 Gerek na, a ləvey: «asi salay anğa».

wure keɗe, aləkwa fa hətakwa ndaw-magədanj fa wey da ray cek hay tabiya na, daa ba.

⁹ Ama ya sərkwā *Yesu na, ta terey la nga mecəhe da ray maslanj hay nga Gazlavay nga menjey nekəɗey, amba a məcey maja ndəhay tabiya maja dey-ceceh nga Gazlavay. Ahaw, ya sərkwā Yesu na, Gazlavay fa həlma, fa həslar ray ga. A ka kəne na, maja aa ma serey banay daa meməcey.

¹⁰ Ara Gazlavay ma kata cek hay tabiya. Cek hay a tabiya a njam na, maja anja. Anda keɗe, ta mbafar la a Gazlavay amba a tərda Yesu nga ndaw ma gwa nga kata cek hay tabiya maaya maaya ta fa banay masa aa ma sərə. Gazlavay a ka anda keɗe na, amba ndəhay ga a tərām nga bəz anja hay, a mbəzdata aa slam anja mewəɗey, maja ara Yesu ma da handata nga ləhey.

¹¹ Yesu fa tərdata ndəhay nga ndəhay maaya manjar meborey fa mey nga Gazlavay. Ndəhay maaya ha na, Papa ata letək ta Yesu a. Ara maja ngene, Yesu ma zəлта «məlma adaw hay». Kwa hwaray a kar nga zəлта kəne ba.

¹² Yesu a ləvar a Gazlavay:
«Ya daa guzltar a məlma adaw hay
da ray cek masa kah ma ka.
Ya da həlmaka fa mey nga ndəhay akah hay
tabiya.»

¹³ Aa guzley saya, a ləvey:
«Yah na, ya da pa Gazlavay

nga ndaw adaw mandaw mandaw.»

A lövey saya:

«Yah keđe, yah ta ndøhay adaw hay
masa Gazlavay ma vøldatiwa.»

¹⁴ Ndøhay anğa hay a na, ata ndøhay magødan. Ara maja nğene, Yesu ma tørey nğa ndaw-magødan anda ata may. A ka køne na, amba ta fa memøcey anğa aa zøđda *Satan, bay-malula, ma handørwa memøcey a bøla.

¹⁵ Ndøhay da bøla keđe na, ata anda beke hay daa menjey ata tabiya maja fa zluram ta memøcey. Ara maja nğene, Yesu a møcey na, amba a pøskatørwa ndøhay daa beke he, a zluram ta memøcey saba.

¹⁶ Yaw, Yesu a sawa a bøla na, nğa jøney maslan hay nğa Gazlavay ba, ama a sawa nğa jøney ndøhay daa sækway nğa *Aberaham.

¹⁷ Ara maja nğene, si a tørey nğa ndaw-magødan anda mølmaha hay daa cek hay tabiya. A ka køne na, amba a tørey nğa *ndaw mahura da ray ndøhay ma ka kwakwas nğa Gazlavay, ndaw masa ma sørey dey-ceceh fa ndaw, ma ka sløra nğa Gazlavay ta cøved e. Sløra anğa na, ara nğa vøley ray anğa nğa møcey amba a mbøkdatara mebørey nğa ndøhay.

¹⁸ Fara fara, daa masa Yesu fa sørey banay na, Satan ta jada la nğa bata. Anda keđe, Yesu a gwa nğa jønta ndøhay masa Satan fa jadata nğa betey.

2:13 2.13 Iz 8.17-18 **2:14 2.14** 2.17; Jan 1.14; **bay-malula:** Jan 8.44; 12.31; 1Jn 3.8; CWJ 12.10 **2:15 2.15** Rm 8.21 **2:16 2.16** Iz 41.8-9 **2:17 2.17** 4.14; 5.2; Føl 2.7; 1Jn 2.2 **2:18 2.18** 4.15; Mt 4.1-11

3

Yesu a fəna Mawiz

¹ Məlma adaw hay daa *mecəmey-ray nga ndəhay nga Yesu, Gazlavay ta zəlkwar la nga tərey ndəhay anğa hay. Anda keđe, wulkam da ray Yesu, ndaw masa Gazlavay ma slərdərwa nga key ndaw mahura da ray ndəhay ma ka kwakwas anğa. Ara ta fa anğa aləkwa ma təbkwa mey nga Gazlavay, aləkwa fa wuzdakwa mey a fa mey nga ndəhay tabiya.

² Ara Gazlavay ma pa nga ka sləra ha. A ka sləra ha na, ta cəved e anda *Mawiz ma ka sləra anğa ta cəved e ngada ndəhay nga Gazlavay tabiya zleezle may.

³ Yesu na, si ndəhay aa həmdamara ma fəna Mawiz. Ara kəne may, ndaw ma ləma way na, aa həmdamara a fəna way a.

⁴ Ka sərmara, kwa way wura wura na, ndaw ma ləma daha. Ama ma katərwa cek hay tabiya na, ara Gazlavay.

⁵ Mawiz na, ara ndaw ma ka sləra ta cəved e da wuzlah ndəhay nga Gazlavay tabiya. Ara anğa ma wuzdatara mey masa Gazlavay ma daa guzlda ngada fa mey.

⁶ Ama ma wey da ray ndəhay nga Gazlavay tabiya ta cəved e na, ara *Kəriste, Bəzey nga Gazlavay. Da aləkwa fa jarakwa maaya maaya daa mey nga Gazlavay masa aləkwa ma təbkwa,

asaya, da aləkwa fa səkwakwa cek masa Gazlavay ma da völdandakwara ta meesəmey na, ɲgene, aləkwa ndəhay anɲa hay.

Mey da ray meməskey-vaw ɲga ndəhay ɲga Gazlavay

⁷ Maja ɲgene, *Mesəfney ɲga Gazlavay a ləvey:

«Da akwar fa cəndamara dɔy ɲga Gazlavay tasana na,

⁸ ka da dəzlmata sləmay akwar hay ba.

Ka da kamara anda papaɲ ɲga papakw akwar hay zleezle

ma kam həma a ray Gazlavay ba.

Daa ɲgene, ata da wuzlah-ley, ta jadamara Gazlavay la.»

⁹ Gazlavay aa guzley, a ləvey:

«Da wuzlah-ley a, ta hətmatar cek hay maaya tabiya

masa yah ma kata daa mevey kwakwar məfad la.

Ama ta ɲgene he cəpa, ta jadamaya la cəɲga.

¹⁰ Ara maja ɲgene, yah ma cey mevel a ray ata.

Ta', yaa guzley, ya ləvey: "Mewulkey ata, anɲa maaya ba,

cek masa yah ma wudəy amba a kamara na, ta sərmara daa ba."

¹¹ Daa masa yah ma cey mevel heyey na,

ya ta mbedəy la, ya ləvey:

3:6 3.6 Bəzey ɲga Gazlavay: 5.8; **aləkwa fa səkwakwa cek:** 3.14; 4.14; 6.18-19; 9.28; 10.22-24, 35; 13.14; Kwa 1.23; Fəl 3.20; 2Tm 4.8 **3:7 3.7-11** Ps 95.7-11 **3:8 3.8** Mab 17.7; Mesl 20.2-5

“Kwa fa da mbəzam aa slam masa yah ma
điytara

nga məskey vaw na, daa ba səlak.”»

¹² Məlma ađaw hay, wam vaw! Ndəhay masa ta mevel maaya ba, ma təba mey nga Gazlavay ba na, kwa ndaw pal da wuzlah akwar a da tərey anda ata ba, maja mevel maaya ba anda ŋgene na, a da zlangađadakwar ta Gazlavay, ndaw masa ŋga daha ta dey nga səmataw.

¹³ Ama maaya na, ka dəkam mevel da wuzlah akwar mandaw mandaw, amba *Sataŋ a batakwar nga key mebərey ba, kwa ndaw pal da wuzlah akwar fa da dəzla sləmay daa ba. Ahaw, dəkam mevel da wuzlah akwar, maja tasana keđe, Gazlavay a wuđey ŋgaa guzldakwar saya.

¹⁴ Mey nga Gazlavay masa aləkwa ma təkwa dəga nga mezley a haa mendəvey a na, da aləkwa fa jarakwa maaya maaya daa mey a na, ŋgene, aləkwa ndəhay nga *Kəriste.

¹⁵ Mawuzlalakaya daa đerewel nga Gazlavay, a ləvey:

«Da akwar fa cəndamara đay nga Gazlavay tasana na,

ka da dəzlmata sləmay akwar hay ba.

Ka da kamara anda papaŋ nga papakw akwar hay zleezle

ma kam həma a ray Gazlavay ba.»

¹⁶ Ma cəndamara đay nga Gazlavay ta ma kam həma a ray a na, wa hay wa? Ara ndəhay tabiya masa *Mawiz ma badatərwa daa hwayak nga *Ejip.

¹⁷ Gazlavay a cey mevel mevey kwakwar mofad na, da ray wa hay wa? A cey mevel na, da ray ndohay a ma kam meborey. Anda kefe, ata cõpa ta mõcam sem da wuzlah-ley.

¹⁸ Gazlavay ta mbedey la, a lõvey: «Kwa fa da mbõzam aa slam masa yah ma diytara nga mõskey vaw na, daa ba sõlak.» A mbedey kõne na, maja wa hay wa? A mbedey na, maja ndohay a ma cõnmar mey ba.

¹⁹ Fara fara, ya sõrkwa ta hõtam nga mbõzey aa slam memõskey-vaw a daa ba, maja ata ma tõbmara mey nga Gazlavay daa ba.

4

¹ Zleezle na, Gazlavay taa guzley la amba ya mbõzkwa aa slam masa anga ma diyndakwara nga mõskey vaw. Mey a na, aa daha cõnga. Anda kefe, wakwa vaw, anja ndaw pal da wuzlah akwar nga mbõkey fa dõba ba.

² Ta wuzdamandakwara mey maaya nga Gazlavay la anda ata ma wuzdamatara a papaŋ nga papa alõkwa hay zleezle may. Ama ata na, mey a ta jõnta daa ba, maja ata ma tõbmara mey a ta mevel pal daa ba. Anda kefe, ta hõtam nga mbõzey aa slam memõskey-vaw masa Gazlavay ma diytara daa ba.

³ Ama alõkwa na, ya ta tõbkwa mey a la. Anda kefe, ya hõtkwa nga mbõzey aa slam memõskey-vaw a la. Gazlavay taa guzley la da ray ndohay masa ma tõbmara mey a ba, a lõvey: «Daa masa yah ma cey mevel heyey na,

ya ta mbedfey la, ya lövey:

“Kwa fa da mbəzam aa slam masa yah ma
điytara

nga məskey vaw na, daa ba səlak.”»

Ama Gazlavay na, ta ndəvda sləra anğa sem
dəga nga mezley nga bəla, ba diya?

⁴ Ya sərkwa na, maja mawuzlalakaya da ray
*pas meməskey-vaw daa đerewel nga Gazlavay,
a lövey: «Gazlavay ta kata sləra anğa hay la
tabiya đar maakwaw, nga đar maasala ha na,
a məskey vaw.»

⁵ Anda mawuzlalakaya heyey saya, a lövey:
«Kwa fa da mbəzam aa slam masa yah ma
điytara nga məskey vaw na, daa ba səlak.»

⁶ Ndəhay ma cəndamara mey maaya nga Ga-
zlavay teesəd na, ta hətam nga mbəzey aa
slam masa Gazlavay ma điytara ha na, daa
ba, maja ata ma cənmar mey ba. Anda keđe,
ndəhay mekele a hətam nga mbəzey la aa slam
meməskey-vaw a cəngə.

⁷ Maja nğene, Gazlavay ta pey đar mekele la, a
zəla đar a «tasana». Fa dəba ha mevey ga, taa
guzley la da ray đar a ta mey *Davit. Mey a na,
ara mey makadakaya heyey ma lövey:

«Da akwar fa cəndamara đay nga Gazlavay
tasana na,

ka da dəzlmata sləmay akwar hay ba.»

⁸ Da fara fara Jesəwe ta handata papaŋ nga
papa aləkwa hay la aa slam meməskey-vaw
masa Gazlavay ma điytara na, anja nğene,

Gazlavay fa daa guzley da ray dar meməskey-vaw mekele fa dəba ha na, daa saba.

⁹ Anda kefe, ya sərkwā, ngada ndəhay nga Gazlavay na, meməskey-vaw daha. Meməskey-vaw a na, ara anda Gazlavay ma məskey vaw nga dar maasala ha.

¹⁰ Yaw, kwa waawa ma mbəzey aa slam meməskey-vaw nga Gazlavay a na, a da məskey vaw fa dəba nga sləra anğa anda Gazlavay ma məskey vaw fa dəba nga sləra anğa may.

¹¹ Maja ngene, kakwa gədanj amba ya hətkwa membəzey aa slam meməskey-vaw masa Gazlavay ma diya ha. Wakwa vaw amba kwa ndaw pal da wuzlah aləkwa a key həma a ray Gazlavay anda papanj nga papa aləkwa hay ba. Da daa ba na, ndaw aha a daa zədey.

¹² Mey nga Gazlavay na, aa ta gədanj, fa key sləra daa ndaw, a zəmey a fəna dəlaw masa mey a cew. Mey a na, a mbəzey kasl aa mevel nga ndaw anda dəlaw ma wunka mezəvey hay nga tetesl ma mbəzey kasl aa sasəraḅ. A wuzdərwa mewulkey daa mevel nga ndaw, asaya, a wuzdərwa cek masa ndaw ma wufey nga ka.

¹³ Cek mabakaya fa dey nga Gazlavay na, daa ba. Cek hay tabiya masa anğa ma kata na, fa hətam fa dey anğa maaya maaya. Cek hay tabiya masa aləkwa ma kakwa na, ya wuzdakwa la fa mey anğa.

Yesu anğa ndaw mahura da ray ndəhay ma ka

kwakwas nga Gazlavay

¹⁴ Ndaw aləkwa mahura da ray ndəhay ma ka kwakwas nga Gazlavay masa ma təpey a cakay Gazlavay a vad na, daha. Ara Yesu, Bəzey nga Gazlavay. Maja ngene, jarakwa maaya maaya daa mey nga Gazlavay masa aləkwa ma təbkwa ta masa aləkwa ma wuzdakwa fa mey nga ndəhay tabiya.

¹⁵ Ndaw aləkwa mahura da ray ndəhay ma ka kwakwas nga Gazlavay a ta sərfandakwar dey-ceceh la daa banay aləkwa maja aləkwa ndəhay masa-bəle hay. Anğa na, ta sərey banay la anda aləkwa, ta jadamara la nga betey dey weewe ta fa cek hay mekele mekele nga key mebərey, ama kwa ta key mebərey daa ba.

¹⁶ Anda keɗe, ngechakwa ngada fa Bay Gazlavay, ndaw masa ma wudta ndəhay kalah. Ngechakwa ta mandərzay daa dey daa ba amba a sərfandakwar dey-ceceh, a kandakwar maaya, a jəndakwar ta pas masa aləkwa daa banay.

5

¹ Kwa *ndaw mahura da ray ndəhay ma ka kwakwas nga Gazlavay wura wura, a walamara na, da wuzlah ndəhay. Sləra anğa na, ara mekey kwakwas nga Gazlavay maja ndəhay. A vələr cek a Gazlavay, asaya, a hərar gənow ngada Gazlavay, amba Gazlavay a mbəkdatara mebərey nga ndəhay.

4:14 4.14 5.8; 8.1; *ndaw mahura da ray ndəhay ma ka kwakwas nga Gazlavay*: 2.17-18; 3.1; 5.1, 4-6; 7.24-28; 8.3; 9.7, 11 **4:15 4.15** 2.18; 5.2; 7.26; 9.12; 1Jn 3.5 **4:16 4.16** 10.19
5:1 5.1 4.14

² *Ndaw mahura da ray ndohay ma ka kwakwas nga Gazlavay na, anga ray anga, anga ndaw-magodan anda ndohay mekele may. Anda keɗe, a gwa nga jokfatar slomay fa ndohay ma sarmara cek ba ta ndohay masa fa zlangadam la daa coved masa maaya.

³ Maja anga ndaw-magodan na, a horey gonaw nga voley ngada Gazlavay maja meberey nga ndohay daada ba, ama maja meberey anga may.

⁴ Ndaw a gwa a pa ray anga nga ndaw mahura da ray ndohay ma ka kwakwas nga Gazlavay ta ray anga ba. Si Gazlavay ma pa anda aa ma pa *Aranw.

⁵ *Keriste may ta pa ray anga nga ndaw mahura da ray ndohay ma ka kwakwas nga Gazlavay ta ray anga na, daa ba. Ama ara Gazlavay ma pa, aa guzlar, a lɔvar:

«Kah na, Bɔzey adaw,
dɔga tasana yah Papakw.»

⁶ Daa slam langar, mawuzlalakaya saya, Gazlavay a lɔvar:

«Ka da njeɗ ndaw ma ka kwakwas adaw nga
sarmataw
anda Melkisedek.»

⁷ Daa masa Yesu Keriste anga da bɔla na, a sɔra Gazlavay aa ta godan nga lohda daa memocey. Anda keɗe, ta dɔrar dangay la ta mewudey, ta matɔway daa dey a Gazlavay.

5:2 5.2 2.17-18; 4.15; 7.28 5:3 5.3 7.27; 9.7; Lev 9.7; 16.6, 15

5:4 5.4 Aranw: Mab 28.1 5:5 5.5 1.5 5:6 5.6 Ps 110.4; Heb

6.20

Gazlavay ta jøkfar sləmay la, ta sləkɗadərwa la daa meməcey, maja aa ma nar ray.

⁸ Kwa an̄ga Bəzey n̄ga Gazlavay na, taa sərkey n̄ga ney ray la ta fa banay masa aa ma səra.

⁹ Masa Gazlavay ma tərda n̄ga ndaw ma gwa n̄ga kata cek hay tabiya maaya maaya cay na, ndəhay ma namar ray tabiya a hətam meləhey la ta fa vəɗa n̄ga sərmataw.

¹⁰ Yesu a gwa a ləhdata, maja Gazlavay ma pa n̄ga ndaw mahura da ray ndəhay ma ka kwakwas an̄ga anda Melkisedek.

Ka da mbəkdamara mey n̄ga Gazlavay ba

¹¹ Mey hay ga daha n̄gaa guzley n̄gada akwar da ray *Kəriste, ndaw aləkwa mahura da ray ndəhay ma ka kwakwas n̄ga Gazlavay. Ama an̄ga ta banay amba ya wuzdakwara mey da ray a maaya maaya, maja akwar fa da cəndamara fiyaw daa ba.

¹² Pas a ta wuswa cay təɗe amba kaa sərkaɗamata ndəhay. Ama haa wure keɗe, si ndəhay aa sərkaɗamakwar da ray mey hay n̄ga Gazlavay masa n̄geeme masa akwar ma cəndamara cay cənḡa. Akwar na, anda bəza hay ma sam ɗəwa ma wusmara n̄ga zəmey ɗaf ba aran̄.

¹³ Kwa waawa ma sey ɗəwa daada na, an̄ga bəzey mecəhe ɗagay. Cek masa maaya ta maaya ba na, a gwa n̄ga wunkata ba.

5:7 5.7 Mt 26.36-46 **5:8 5.8** 1.2; 4.14; 6.4-6; 7.3, 28; 10.29; Jan 1.34; **meney ray:** 4.15; Fəl 2.8 **5:9 5.9** 7.27 **5:10 5.10** 5.6; 6.20 **5:12 5.12-13** 1Kwr 3.2

14 Ndɔhay mahura hay a zɔmam na, daf. Ata na, makɔtatakaya, a gwamara nɔa wunkey cek masa maaya ta maaya ba.

6

¹ Maja nɔgene, nakwa fa mey fa mey, sasɛrkakwa cek masa nɔa ndɔhay mahura hay. Ya da njakwa daa meesɛrkey nɔa ndɔhay masa ma sɛrmara mey nɔa Kɛriste tɔlam ba. Alɛkwa taa sɛrkakwa cek hay masa nɔgeeme daa metɔbey mey nɔa Yesu Kɛriste cay. Anda melɔvey, alɛkwa taa sɛrkakwa cay da ray membɔkey mekey cek ma hendey ndaw aa memɔcey, asaya, da ray mepey Gazlavay nɔa ndaw fara fara.

² Alɛkwa taa sɛrkakwa cay da ray *baptem mekele mekele, da ray mepey har a ray ndɔhay *, da ray maslɛkdawa nɔa ndɔhay daa memɔcey, lej da ray sariya masa Gazlavay ma da dɛsla ma da nɔey nɔa sɛrmataw.

³ Ahaw, nakwa fa mey fa mey! Da Gazlavay ta tɔba la na, ya daa sɛrkakwa meesɛrkey nɔa ndɔhay mahura hay dɔba.

⁴ Ndɔhay masa ma mbɔdmar dɔba sem a Gazlavay na, a gwamara a vɔhmawa nɔaa cɔfdɛy ambahw fa Gazlavay saya na, kwara? Ta njam la dey pal daa mewɛdɛy nɔa Gazlavay. Cek da

5:14 5.14 13.9; Rm 16.19; 1Kwr 14.20; Ef 4.14 6:1 6.1 9.14

* 6:2 6.2 mepey har a ray ndɔhay: Ara cek mekey nɔa wuzda ndaw aha mapakaya wal nɔgada Gazlavay amba Mesɔfney nɔa Gazlavay a sawa a ray a, kwa daa baptem, kwa daa slɛra wura wura nɔgada Gazlavay. Nɔka SNM 13.2-3; 1Tm 4.14. 6:2 6.2 Jan 3.25-26; SNM 19.1-6

vad masa Gazlavay ma vèdatara ngada ndəhay anğa hay na, taa cəkdamara la. *Mesəfney nga Gazlavay ta sawa la a ray ata may.

⁵ Ta sərmara la mey nga Gazlavay na, ara mey maaya fara fara. Asaya, ta sərmara maazla hay ma da kam ngada fa mey la.

⁶ Ama, ta nğene he cəpa, ta mbəđmar dəba sem a Gazlavay cəngə. Ndəhay a, a gwamara nga vəhmawa ngaa cəfdəy ambahw fa Gazlavay saba, maja da ndaw ta mbəđar dəba sem a Gazlavay na, a key nğene, anda a dəra Bəzey nga Gazlavay fa hwadam mazlanğalakaya saya. Asaya, a key nğene, anda a cəda fa mey nga ndəhay.

⁷ Wulkakwa da ray ley cey! Ley masa var fa pey da hwad a maaya maaya na, cek daa ley a, a key maaya maaya ngada ndaw nga ley a. Anda kedə, a wuzwa maaya nga Gazlavay aa da ray ley a.

⁸ Ama da ley a, guzer ta hatak ta təba sem na, nğene ara ley maaya ba. Ley a fa da njeý ga daa ba, Gazlavay a da nəsa, a da mbəkda aa kusaf, fa dəba ha, awaw a daa wura kəlmedək!

⁹ Jam adaw hay, kwa da yaa guzlmakwar anda kedə na, ya sərmara fara fara, akwar daa cəved maaya masa ma da ləhdakwar.

¹⁰ Gazlavay na, ara ndaw ma key cek ta cəved e, aa fa sərfada sləra maaya masa akwar ma kamara. Asaya, aa fa sərfada akwar fa wudmara. Akwar fa wuzdamərwa mewudəy-vaw akwar a ta fa sləra masa akwar ma kamara

zleezle ngada ndəhay mekele daa *mecəmey-ray nga ndəhay nga Yesu. Kwa wure keɗe, akwar fa kamara kəne.

¹¹ Ya wuɗam na, kwa waawa da wuzlah akwar a key gədaŋ nga njeɣ kəne haa mendəvey a, ka da gəram ba, amba ka hətam cek hay tabiya masa akwar ma səkwmar.

¹² Ka da təram ndəhay masa-mayaɗ hay ba, ama njam anda ndəhay ma təba mey nga Gazlavay masa majaratakaya. Ata na, a hətam cek masa Gazlavay ma ləvey a da vəldatara a ndəhay aŋga hay heyey la. Kam cek anda ata.

Mey da ray Gazlavay ma da katar maaya ngada ndəhay aŋga hay

¹³ Masa Gazlavay ma ləvar a *Abəraham a da kar maaya heyey na, ta mbedey la fara fara, a ka cek aha la. Ndaw ma fəna Gazlavay na, daa ba. Anda keɗe, ta mbedey la ta mezəley aŋga.

¹⁴ A ləvey:

«Fara fara, ya da pəska mey, ya da vəlka bəza hay ga ara mey ba.»

¹⁵ Masa Abəraham ma cənda mey a la na, ta', a səkwa ta dək-vaw. Anda keɗe, Abəraham ta hətey cek masa Gazlavay ma ləvar a da kara heyey la.

¹⁶ Da ndəhay fa mbaɗam na, a mbaɗam ta mezəley nga ndəhay masa mahura da ray ata hay. *Membedey na, a dəsla mey da wuzlah ndəhay.

6:10 6.10 10.32-34; 13.1; 1Jn 4.7-12, 19-21 **6:12 6.12** 11.1-12; Lk 21.19 **6:13 6.13-14** MC 22.16-17; Heb 11.12 **6:16 6.16** Mab 22.10; Mt 5.34; 23.16-22

¹⁷ Maja ngene, Gazlavay a mbedey amba ndohay masa aa ma lvey a da katar maaya heyey na, a sormara fara fara, a katara la, a mbodda mewulkey anga ba. Anda kede, a mbedey, a lvtar a da katar cek maaya.

¹⁸ Mey ma lvey Gazlavay a da katar maaya ngada ndohay anga hay, lej mbedey anga na, ara mey hay cew masa a mbodam ba, maja Gazlavay na, a mborzley ba selak. Alakwa masa ta ngochakwa sem ngada fa Gazlavay kede na, mey hay a kede fa vɔndakwar gɔdan ga amba ya sɔkwakwa cek masa Gazlavay ma lvey a da vɔldandakwara heyey.

¹⁹ Cek masa alakwa ma sɔkwakwa ha na, fa jarandakwar maaya maaya amba ya njakwa majaratakaya fa mey nga Gazlavay. Maja ngene, *Slam masa Gazlavay aa da hwad a na, zana ma gɔrca slam aha a wurey la, anda kede, ya mbɔzkwa la a hwad a, a cakay Gazlavay.

²⁰ Yesu ta mbzey sem aa slam aha ngene teesed da ray alakwa. A mbzey na, maja alakwa, maja anga ta tɔrey sem nga *ndaw mahura da ray ndohay ma ka kwakwas nga Gazlavay nga sormataw anda Melkisedek.

7

Mey da ray Melkisedek

¹ Melkisedek na, ara bay daa berney nga Salem, asaya, anga *ndaw ma ka kwakwas nga Gazlavay, Gazlavay Mawaca-waca. Daa ngene

na, *Abøraham ta føntørwa bay hay la ta gødan daa vøram. Masa anğa fa vøhwa na, ta', Melkisedek a daw, a cadørwa ray, a pøsar mey.

² Abøraham a wunka cek masa anğa ma tøbterwa daa vøram a, slam kuraw, a la slam pal, a vøldara a Melkisedek e. Mezøley anğa Melkisedek na, a wudfey nğa løvey «bay ma key cek ta cøved e.» Asaya, Melkisedek e anğa «bay ma wudfey zazay da wuzlah ndøhay,» maja anğa bay nğa Salem. Salem na, a wudfey nğa løvey «zazay».

³ Anğa na, dferewel nğa Gazlavay faa guzley da ray papaha ta mamaha, lej da ray søkway anğa hay na, daa ba. Asaya, faa guzley da ray mayawa anğa ta memøcey anğa daa ba. Anğa na, anda Yesu, Bøzey nğa Gazlavay, anğa ndaw ma ka kwakwas nğa Gazlavay nğa sørmataw.

⁴ Nøkmara cey! Melkisedek na, anğa ndaw mahura, ba daw? Maja kwa Abøraham zleezle, Papan nğa papa aløkwa hay na, ta wunka cek hay masa anğa ma tøbterwa daa vøram la slam kuraw, ta vøldara slam pal sem.

⁵ Kwakwas nğa *Mawiz a vøley cøved a ndøhay daa søkway nğa *Levi masa ma ka kwakwas, nğa tøbey cek pal daa kuraw nğa cek hay tabiya da har ndøhay *Israyel hay. Kwa Israyel hay a, ara mølma ata hay daa søkway nğa Abøraham. Ta ngene he cøpa, fa tøbam cek da har ata cønğa.

⁶ Melkisedek na, anğa daa *søkway nğa Levi ba, ama ta ngene he cøpa, ta tøbey cek pal daa

kuraw la da har Abøraham. Abøraham masa Gazlavay ma løvar a da kar maaya heyey na, ara anga ma pøsar mey ngada Melkisedek ba, ama ara Melkisedek ma pøsar mey a Abøraham.

⁷ Ka sørmara, ndaw ma pøsey mey a ndaw na, aa mahura da ray ndaw aha. Anda kefe, Melkisedek na, aa mahura da ray Abøraham.

⁸ Ndøhay ma ka kwakwas daa sækway nga Levi ma tøbam cek pal daa kuraw na, ata ndøhay masa ma da møcam gway. Ama Melkisedek masa ma tøba cek pal daa kuraw da har Abøraham heyey na, aa ta dey nga sørmataw, anda ðerewel nga Gazlavay ma løvey.

⁹ Ya gwakwa ya løvkwa ndøhay daa sækway nga Levi masa ma tøbam cek pal daa kuraw da har ndøhay mekele na, ta vølmar la a Melkisedek may, maja papan nga papa ata Abøraham ma vølar la.

¹⁰ Anda meløvey, masa Abøraham ma vølar cek a Melkisedek e na, ta yawa bøzey daa ba aran. Ama kwa ta yawa bøzey daa ba aran na, Abøraham a vølar cek a Melkisedek e. Ara anda ata cewete ta Levi, bøzey ma da yawa daa sækway anga may. Anda kefe, a wufey nga løvey Melkisedek na, a fønta ndøhay daa sækway nga Levi.

Mey da ray Yesu, ndaw ma ka kwakwas anda Melkisedek

¹¹ Daa *mewey nga *Israyel hay na, ndøhay ma ka kwakwas nga Gazlavay na, si ndøhay daa sækway nga *Levi gway. Sløra nga ndøhay a ngene na, ara anda *Aranw, papan nga papa ata hay zleezle, ma ka. Sløra ha na, a gwa nga

ndɔvda cek masa Gazlavay ma wufey nga ka ba. Da a gwa nga ndɔvda na, anja Gazlavay fa da pey ndaw ma ka kwakwas mekele masa anda Melkisedek na, daa saba.

¹² Da Gazlavay ta mbɔɔda ndaw ma ka kwakwas anɔa sem na, nɔgene, si mewey nga Israyel hay a mbɔɔdey may.

¹³ Bay alɔkwa Mahura Yesu masa alɔkwa maa guzlkwa da ray a kede na, sɔkway anɔa wal ta *sɔkway nga Levi. Kwa ndaw daa sɔkway anɔa pal masa anɔa *ndaw ma ka kwakwas nga Gazlavay na, daa ba.

¹⁴ Ya sɔrkwa fara fara Yesu na, a yawa daa sɔkway nga Juda. Daa masa *Mawiz maa guzley da ray ndɔhay ma ka kwakwas na, kwa taa guzley da ray sɔkway a daa ba.

¹⁵ Ndɔhay ma ka kwakwas nga Gazlavay masa daa sɔkway nga Levi na, a gwamara nga handamata ndɔhay fa Gazlavay ba. Mey a kede, fa wuzwa maaya maaya maja Gazlavay ta pey ndaw mekele la nga ndaw ma ka kwakwas anɔa anda Melkisedek.

¹⁶ Ndaw a, a tɔrey ndaw ma ka kwakwas nga Gazlavay na, ta fa mewey nga ndaw-magɔdan ba, ama ta fa gɔdan nga heter mendɔvey ba,

¹⁷ maja mawuzlalakaya daa ɔerewel nga Gazlavay, a lɔvey:

«Ka da nɔjey ndaw ma ka kwakwas aɔaw nga sɔrmataw anda Melkisedek.»

¹⁸ Anda keđe, mewey masa zleezle na, mahaz-akadakaya sem maja ara cek nga tede, a joney ndaw ba.

¹⁹ Kwakwas nga Mawiz na, ta gwa nga ləhdata ndəhay daa ba. Ama wure keđe, aləkwa ma pakwa lengesl a ray cek mahura maaya masa aləkwa ma səkwakwa heyey la. Ara ta fa cek aha aləkwa ma da ngəchakwa ngada fa Gazlavay.

²⁰⁻²¹ Asaya, Gazlavay a pa Yesu nga ndaw ma ka kwakwas anga na, ta mbedey la maja. Ama ndəhay mekele ma təram nga ndəhay ma ka kwakwas zleezle na, Gazlavay ta mbedey maja daa ba. Ahaw, Gazlavay ta mbedey la maja Yesu, a ləvey:

«Yah, Bay Gazlavay akah, ya fa mbedey,

kwa ya fa da mbədda mey adaw daa ba səlak:

“Ka da njeý ndaw ma ka kwakwas adaw nga sərmataw.”»

²² Maja ngene, ya sərkwa fara fara, Yesu na, ara anga ma handərwa *mejəwey-mey maaya ma fəna masa zleezle.

²³ Cek mekele daha saya, ndəhay ma ka kwakwas masa daa səkway nga Levi na, ata ga maja fa məcám, fa pam mekele, fa məcám, fa pam mekele.

²⁴ Ama Yesu na, aa daha nga sərmataw, sləra anga nga mekey kwakwas na, fa da ndəvey daa ba.

²⁵ Maja ngene, Yesu aa ta gədan mandaw mandaw nga ləhdata ndəhay masa ma ngəcham ngada fa Gazlavay ta fa anga. A gwa a ka kəne

maja aa ta dey nga sɛrmataw, anɣa fa dɛrar dangay mandaw mandaw a Gazlavay maja ata.

²⁶ Yesu na, ara *ndaw mahura da ray ndɛhay ma ka kwakwas nga Gazlavay masa ma gwa nga jɛndakwar. Anɣa na, aa maaya fa Gazlavay, manɣera fa vɛda daa ba, mebɛrey da ray a kwa nekɛdey daa ba. Gazlavay a pa wal, aa da wuzlah ndɛhay ta mebɛrey daa saba, a la a vad a cakay a.

²⁷ Yesu na, anɣa anda mahura hay da ray ndɛhay ma ka kwakwas nga Gazlavay mekele hay ba. Ata na, fa vɛlam cek a Gazlavay mandaw mandaw, nɣeeme, maja mebɛrey ata, fa dɛba ha, maja mebɛrey nga ndɛhay. Ama Yesu na, si a ka kɛne na, daa ba. A vɛlar cek a Gazlavay dey pal gway na, mak, mekele daa ba. Cek aha na, ara anɣa ma vɛlda ray anɣa nga mɛcey.

²⁸ Kwakwas nga Mawiz a pey nga ndɛhay ma ka kwakwas nga Gazlavay na, ndɛhay magɛdan gway. Ndɛhay a na, ara ndɛhay ta mebɛrey. Ama daa masa Gazlavay ma mbedey na, *membedey a, ta nɣey sem aa slam a nga kwakwas nga Mawiz. Gazlavay a pey nga ndaw mahura da ray ndɛhay ma ka kwakwas anɣa na, Bɛzey anɣa. A pa na, nga sɛrmataw. Gazlavay ta tɛrda sem nga ndaw ma gwa nga kata cek hay tabiya maaya maaya.

8

7:25 7.25 2.11; 10.14; Rm 8.34; 1Jn 2.1 **7:26** 7.26 4.15 **7:27**
7.27 5.3, 9; 7.25; 9.12, 26, 28; 10.10, 12; Rm 6.10; 1Pi 3.18 **7:28**
7.28 5.1-2, 8; 7.19; Ps 2.7

Mey da ray Yesu, ndaw mahura da ray ndøhay ma ka kwakwas nga Gazlavay

¹ Fara fara ndaw alækwa mahura da ray ndøhay ma ka kwakwas nga Gazlavay na, daha. Ara Yesu, aa manjakaya ta har-zømay nga Bay Gazlavay da vad, fa wey da ray cek hay tabiya. Kede he ara *bay-ray nga mey masa ala ma wudam nga løyey.

² Annga na, a ka sløra annga daa Way-mekørcøy fara fara masa da vad, daa *Slam masa Gazlavay aa da hwad a masa fara fara. Ara slam masa Gazlavay ma ðiya da vad, ba na, ara slam masa ndaw ma ðiya da hwayak ba.

³ *Ndaw mahura da ray ndøhay ma ka kwakwas nga Gazlavay wura wura na, sløra annga ara nga vøley cek ta nga hørar gønaw a Gazlavay. Anda kede, Yesu na, si a vølar cek a Gazlavay may.

⁴ Da haa wure kede annga da bøla na, anja kwa fa da key *ndaw ma ka kwakwas nga Gazlavay na, daa ba. Fa da key daa ba na, maja ndøhay ma vølam cek a Gazlavay anda *kwakwas nga Mawiz ma løyey na, daha cay.

⁵ Ndøhay ma ka kwakwas a na, a kamara sløra ata daa way nga Gazlavay. Ama sløra masa ata ma kamara ha na, ara anda meezed e, ba na, ara anda da gazlavay da vad ba. Cek aha, ta key la køne ta Mawiz may. Daa masa fa da kørca way ngada Gazlavay na, Gazlavay a løyar: «Jøkey slømay maaya maaya, kørca way a ta

cøved e anda yah ma løvka daa anɣwa nga Sinay heyey.» ⁶ Ama wure kedfe, sløra masa Yesu ma ka na, a føna sløra masa ndøhay ma ka kwakwas a ma kamara. Asaya, Yesu a cømtar ðay nga ndøhay ta Gazlavay amba Gazlavay a jøwey mey mawiya ta ata. *Mejøwey-mey Mawiya ha na, a føna mejøwey-mey masa zleezle maja cek masa Gazlavay ma løvey a da katara a ndøhay daa mejøwey-mey mawiya na, a føna cek masa aa ma løvey daa mejøwey-mey masa zleezle.

Mey da ray mejøwey-mey mawiya

⁷ Da *mejøwey-mey ngeeme ta gwa nga ka cek tabiya anda Gazlavay ma wufey la na, anja ngene, Gazlavay fa da jøwey mey mekele daa saba.

⁸ Ama Gazlavay ta mbødtar ray sem a ndøhay anɣa hay maja mebørey ata. A løvtar:

«Yah, Bay Gazlavay, ya løvey: pas a, a wuswa la masa yah ma da jøwey mey mawiya ta ndøhay Israyel hay leŋ ta ndøhay daa sækway nga Juda.

⁹ Mejøwey-mey a na, fa da key anda mejøwey-mey

masa yah ma ka ta papanɣ nga papa ata hay zleezle

daa masa yah ma badatørwa

daa hwayak nga Ejip heyey na, daa ba.

Ndøhay a ta søpmara mejøwey-mey a ta cøved e daa ba.

8:5 8.5 9.9; 10.1; Kwa 2.17; **way mekørcey:** 9.2; Mab 25.9, 40
8:6 8.6 7.22; 8.2, 6, 13; 9.11, 15; 12.24; Iz 55.3; Jer 31.31-33; Ez 37.26; 1Kwr 11.25 **8:8** 8.8-12 Jer 31.31-34; Heb 10.16-17

Ara maja ηgene, yah ma mbədfar dəba.

¹⁰ Yah, Bay Gazlavay, ya ləvey:

Mejəwey-mey masa yah ma da ka

ta ndəhay *Israyel hay ηgada fa mey na,

ara mewuzey kwakwas adaw ηgada ata,

ahaw, ya wuzlalatara la aa mevel ata.

Ya da tərey Gazlavay ata,

ata may, a da təram ndəhay adaw hay.

¹¹ Kwa ndaw ma daa sərkada ndaw daa hwayak
anğa,

da daa ba, məlmaha,

a ləvar: “Si ka səra Bay Gazlavay” na, daa ba,

maja ata tabiya, kwa bəza hay, kwa mahura

hay na,

a sərmaya la.

¹² Yaw, ya mbəkdatara manğəra ata la,

kwa ya fa da sərfada mebərey ata daa saba.»

¹³ Masa Gazlavay maa guzley da ray mejəwey-

mey mawiya na, ta tərda mejəwey-mey masa

ηgeeme sem ηga magurma. Cek wura wura

masa magurma na, gweegwe cay aa zədfey.

9

Mey da ray mejəwey-mey masa ηgeeme

¹ Daa *mejəwey-mey masa ηgeeme, *mewey hay daha. Mewey hay a fa wuzdatara cəved a ndəhay ηga səpey Gazlavay. Asaya, slam daha ηga dərey danğay masa ndəhay ma diymara.

² Ta kərcam way la, way a na, mawunkakaya ta zana slam cew. Slam masa ηgeeme na, a zəlmara *Slam maaya ηga Gazlavay. Daa slam

aha na, petərla mahura ta neneh nga awaw hay maasala daha, asaya, taabal daha. Peñ mavəldakaya ngada Gazlavay mapakaya da ray a. ³ Slam ta da dəba zana na, a zəlmara *Slam masa Gazlavay aa da hwađ a.

⁴ Daa slam aha na, slam-meewurey cek mezey maaya ngada Gazlavay daha, slam aha makakaya ta bərey magaza. Asaya, *akwatay nga hwađam daha, bərey magaza makakaya fa vəđa. Daa akwatay a na, taasa makakaya ta bərey magaza daha. Daa taasa ha na, cek mezəmey mezəley «*man» da hwađ a daha. Dangwar nga *Aranw masa maa fekwey heyey aa daa akwatay a, asaya, beeler hay cew masa Gazlavay mawuzlala mewey anga hay fa vəđa heyey, ata daa akwatay a may. *Akwatay a na, ara akwatay nga sərfeđey mejəwey-mey nga Gazlavay ta ndəhay.

⁵ Da ray akwatay a na, cek hay cew daha ta zlara mavəđtakaya ta bərey magaza. Cek hay a na, ata anda maslan hay nga Gazlavay, fa wuzdamərwa Gazlavay aa daa slam aha. Fa ciymata zlara ata hay a ray slam mewucey mambaz amba Gazlavay a mbəkdatara mebərey nga ndəhay. Ama wure keđe, ya gwa nga kada mey da ray cek hay masa daa slam aha cəpa ba.

9:2 9.2 way mekərcey: 8.5; 9.11-12; Mab 26.1-30; **petərla:** Mab 25.31-39; **taabal:** Mab 25.23-30 **9:3 9.3** Mab 26.31-33; Lev 16.2; Heb 6.19; 9.7, 12; 10.20 **9:4 9.4** slam-meewurey cek: Mab 30.1-6; **akwatay:** Mab 25.10-16; **man:** Mab 16.32-35; **dangwar nga Aranw:** Mesl 17.21-25; **beeler hay cew:** Mab 25.16 **9:5 9.5** Mab 25.18-22

⁶ Yaw, cek hay daa way a na, mapatakaya anda kede. Ndøhay ma ka kwakwas nga Gazlavay fa mbøzam mandaw mandaw aa slam masa ngeeme nga key sløra ngada Gazlavay.

⁷ Aa slam masa ta døba zana na, si ndaw mahura da ray ndøhay ma ka kwakwas ma mbøzey a hwađ a gway. A mbøzey na, dey pal fa mevey. A mbøzey na, si ta mambaz nga gønaw da har nga vøley ngada Gazlavay amba Gazlavay a mbøkđara mebørey * anga, asaya, amba a mbøkđatara mebørey nga ndøhay mekele.

⁸ *Mesøfney nga Gazlavay a wuđey nga løvey ta mey a kede na, slam masa ngeeme, da aa daha aran na, cøved nga mbøzey aa Slam masa Gazlavay aa da hwađ a ta døba zana a wurey ba aran.

⁹ Cek hay a cøpa kede na, ara anda mey-menjey ma wuzwa cek hay masa ma kam wure kede. Anda meløvey, cek masa ndaw ma vøđara a Gazlavay ta mehørey gønaw ngada Gazlavay na, a gwa nga tərđa mevel nga ndaw aha maaya fa mey nga Gazlavay ba.

¹⁰ Cek hay a kede na, ara mewey hay da ray cek mezømey, da ray cek mesey, leŋ da ray mesøpey kwakwas nga pørey cek amba a tøram ndøhay ma zløba kwakwas saba gway. Ara na, mewey hay nga ndøhay magøđan gway, fa da njej ga daa ba. A da njej nekøđey haa ta pas masa

9:6 9.6 10.11; Mesl 18.2-6 * **9:7 9.7** mebørey: Daa mewulkey nga Jøwif hay na, Gazlavay a mbøkey na, mebørey masa ndaw ma ka tesuđe ba. **9:7 9.7** 5.3; 9.25; 13.11; Lev 16.2-16 **9:9 9.9** 7.19; 9.2

Gazlavay ma mbøfdata cek hay cøpa mawiya.

Mey da ray Køriste ma vølda ray anga maja aløkwa

¹¹ Wure kefe *Køriste ta sawa la. Anga na, *ndaw mahura da ray ndøhay ma ka kwakwas nga Gazlavay ma handandakwara maaya anga masa aløkwa ma høtkwa wure kefe. A ka sløra anga na, daa way mahura ma føna Way-mekørcøy masa zleezle. Way a na, aa maaya kalah, ara ndaw-magødan ma løma ba. Way a na, aa da bøla kefe ba.

¹² Masa Køriste ma mbøzey aa *Slam masa Gazlavay aa da hwað a heyey na, ta mbøzey ta mambaz nga kwakwaba daa ba, ta mbøzey ta mambaz nga bøz-sla daa ba. Ama a mbøzey na, ta mambaz anga, ray anga. A mbøzey na, dey pal gway nga sørmataw. Anda kefe, ta løhdandakwar sem daa mebørey nga sørmataw.

¹³ Anda kwakwas aløkwa ma løvey na, da ndaw ta zløba kwakwas la na, si a wucmar mambaz nga kwakwaba, da daa ba, nga gusan fa vaw. Da daa ba na, si a lam sla-bølak, a ndølmara, a kwiydamera bebødes e a ray ndaw aha. Anda kefe, ndaw ma zløba kwakwas a na, a tørey ndaw ma søpa kwakwas a maaya maaya døba.

¹⁴ Da anda kefe na, mambaz nga Køriste na, a føna cek masa ata ma kamara ngen ba

9:10 9.10 Lev 11; 15; Mesl 19 **9:11 9.11** 4.14 **9:12 9.12** 7.27; 10.4; Lev 16.14-16; **mambaz nga Køriste:** 9.25; 12.24; 13.12, 20; Mt 26.28; Rm 3.25-26; 1Pi 1.2, 18-19; 1Jn 1.7 **9:13 9.13** Mesl 19.1-10, 17

daw? Mambaz an̄ga na, a fəna mambaz n̄ga gənaw hay ba daw? Kəriste na, kwa ta key mebörey daa ba, ta velda ray an̄ga la a Gazlavay ta gədan̄ n̄ga *Mesəfn̄ey n̄ga Gazlavay masa mendəvey ba n̄ga sərmataw. Mambaz an̄ga na, a pərndakwara mevel amba ya kakwa cek malamba n̄ga handandakwar aa meməcey saba. Anda keđe, ya da kakwa sləra n̄ga Gazlavay, ndaw masa an̄ga daha ta dey n̄ga sərmataw.

¹⁵ Maja n̄gene, Kəriste na, ara ndaw ma cəmtar dəy n̄ga ndəhay ta Gazlavay amba Gazlavay a jəwey mey mawiya ta ndəhay a. Anda keđe, ndəhay masa Gazlavay ma zelta na, a hətam maaya an̄ga masa aa ma ləvtar a da veldatara heyey la. Maaya an̄ga ha a da n̄jey da ray ata n̄ga sərmataw. A hətam la, maja Kəriste ta məcey la. Meməcey an̄ga ha, a ləhdata ndəhay daa mebörey masa ata ma kamara daa masa ata daa *mejəwey-mey n̄geeme heyey.

¹⁶ Yaw, ya sərkwā da ndaw a mbədəy mey na, si ndaw aha a məcey la dəgay amba mey aha, a key.

¹⁷ Da ndaw aa ta dey na, membədəy-mey an̄ga ha a key ba aran̄, si ndaw aha ma məcey la amba membədəy-mey an̄ga a key.

¹⁸ Ara maja n̄gene, kwa mejəwey-mey masa n̄geeme a zley na, ta mambaz.

¹⁹ Ta pas masa Gazlavay ma jəwa mey ta ndəhay *Israyel hay na, teesəd na, *Mawiz a wuzdatara *mewey masa Gazlavay ma veldatara a ndəhay dəgay. Fa dəba ha, a ley mambaz

nga bəz-sla ta nga kwakwaḅa, a jahada ta yam. Asaya, a ley mey-har nga wudez, a ley enɟwec nga təbaŋ mandəvkaya magaza. A paḁa enɟwec e fa mey-har nga wudez heyey, a jəhwḅa aa mambaz a. A wuca fa ɔerewel masa mewey nga Gazlavay mawuzlalakaya fa vəḁa, asaya, a wuctara fa ndəhay tabiya.

²⁰ Aa guzley, a ləvey: «Gazlavay a jəwey mey ta akwar na, ta fa mambaz a keḁe. A ləvkwar nga namar ray a mewey hay daa mejəwey-mey a.»

²¹ Asaya, Mawiz a wucey mambaz heyey fa Way-mekərcey lenj fa cek hay tabiya mekey sləra daa way a may.

²² Anda kwakwas nga Mawiz ma ləvey na, har-gədaŋ nga cek hay a tərām maaya na, ta fa mambaz. Si mambaz a mbəḁwa la ɔagay amba Gazlavay a mbəkdatara mebərey nga ndəhay.

Mey da ray Kəriste ma vəlda ray anɟa maja mebərey nga ndəhay

²³ Ya taa guzlkwar la, ya ləvkwar cek masa *Mawiz maa sərkatatara a ndəhay nga key na, anda meezeḁ nga cek hay masa fara fara da vad gway, ba na, ara cek hay a fara fara ba. Cek masa Mawiz maa sərkatatara a ndəhay nga key na, aa fa tərdata cek hay cəpa maaya ta fa mehörey gənaw hay nɟada Gazlavay. Ama nɟada cek hay da gazlavay da vad na, mehörey gənaw hay nɟada Gazlavay na, ara cek nɟa tede. Si

9:19 9.19-20 Mab 24.6-8; Heb 9.12-13; **mey-har nɟa wudez:** Lev 14.4, 6; Mesl 19.6 **9:22 9.22** Lev 17.11

mekey cek mekele ma fəna. Cek aha na, ara Yesu *Kəriste ma vəlda ray anğa nğa kədey vagay.

²⁴ Kəriste na, ta mbəzey aa *Slam masa Gazlavay aa da hwaɗ a daa Way-mekərcey masa ndəhay magədan ma kərcamara ta har ata na, daa ba. Slam aha ngene na, ara anda meezeɗ e, ba na, ara Slam nğa Gazlavay fara fara ba. Ama Kəriste a mbəzey na, aa slam da gazlavay da vad, Slam masa Gazlavay aa da hwaɗ a fara fara. Wure keɗe, aa daa slam aha fa dərar dangay a Gazlavay maja aləkwa.

²⁵ Asaya, *ndaw mahura da ray ndəhay ma ka kwakwas nğa Gazlavay na, fa mbəzey fa mevey a fa mevey a aa Slam masa Gazlavay aa da hwaɗ a daa Way-mekərcey. A mbəzey na, ta mambaz nğa gənaw da har. Ama Kəriste na, ta daw dey weewe aa Slam masa Gazlavay aa da hwaɗ a da vad nğa vəlda ray anğa nğa məcey maja aləkwa na, daa ba.

²⁶ Da ta vəlda ray anğa la dey weewe na, anja ngene, ta sərey banay la may dey weewe dəga nğa mezley nğa bəla. Ama ta wuzdərwa vaw anğa la dey pal daa masa bəla fa da ndəvey keɗe. Ta vəlda ray anğa la nğa məcey amba a la mebərey nğa ndəhay.

²⁷ Ndaw-magədan na, a da məcey dey pal gway, fa dəba ha, Gazlavay a kar sariya.

²⁸ Kəriste may, ta vəlda ray anğa la dey pal nğa məcey kəne amba a la mebərey nğa ndəhay ga da bəla. A da wuzwa vaw nğa dey cew na, maja

mebørey nga ndøhay saba, ama nga løhdata ndøhay masa fa sækwmara.

10

¹ Cek hay masa maaya ma da kam ngada fa mey na, kwakwas nga Mawiz na, fa wuzdandakwara maaya maaya daa ba. Ama a wuzndakwar na, cek anda meezed e gway. Ndøhay ma səpmara Gazlavay ta fa kwakwas a na, kwa fa da təram maaya fa mey nga Gazlavay maja na, daa ba səlak. Kwakwas a, a wudfey na, ndøhay a həram gənow hay ngada Gazlavay fa mevey a, fa mevey a cənga.

² Da mehørey gənow a wusa nga tərdata ndøhay maaya fa mey nga Gazlavay nga sərmataw na, anja ngene, ndøhay fa da wulkam da ray mebørey ata daa saba, asaya, fa da həram gənow mekele a Gazlavay daa saba.

³ Ama sasəkar jak, ta fa mehørey gənow na, ndøhay fa wulkam da ray mebørey ata fa mevey a fa mevey a,

⁴ maja mambaz nga gusanj ta nga kwakwaba na, a gwa a la mebørey da ray ndaw ba səlak.

⁵ Maja ngene, daa masa Kəriste ma da sawa a bəla na, taa guzlar la a Gazlavay, a ləvar:
«Ka fa wudfey amba ndaw a hərka gənow,
a vəlka cek na, daa ba,
ama ka ta vəlya vaw nga ndaw-magədanj la.

⁶ Mehørey gənow ma fəkmara da ray slam-mefəkey cek,

ta mehørey gønaw ηgada kah
 amba ka mbækda mebørey na, a mbafaka ba.

Ka wufey na, ndøhay a namaka ray.

⁷ Anda kedē, ya ta løvka la: “Bay Gazlavay, ehe
 yah kedē,
 ya sawa a bēla na, ηga key sløra masa kah
 ma wufey
 anda mawuzlalakaya da ray adaw daa
 dferewel akah.”»

⁸ Køriste aa guzlar teesed ηgada Gazlavay na, a
 løvey:

«Ka fa wufey amba ndaw a hørka gønaw,
 a vølka cek na, daa ba.

Ka faa sømey da ray gønaw masa ma hørmara
 ma føkmarā da ray slam-meføkey cek na,
 daa ba.

Asaya, mehørey gønaw ηga mbøkey mebørey
 ηga ndaw na,
 a mbafaka ba may.»

Ta ηgene he cøpa, kwakwas ηga Mawiz a wufey
 na, si ndøhay a vølam cek a Gazlavay anda
 ηgene cønga.

⁹ Fa døba ha, Køriste a løvey saya: «Ehe, yah
 kedē, ya sawa a bēla na, ηga key sløra masa kah
 ma wufey.» Køriste aa guzley anda ηgene na,
 a wufey ηga løvey ta vavøsa mekey kwakwas
 ta gønaw anda masa zleezle sem. Ta', a bawa
 kwakwas mekele mawiya.

¹⁰ Yesu Køriste na, ta kar sløra la a Gazlavay anda
 Gazlavay a ma wufey. Ta vølda ray aηga la
 dey pal ηga møcey maja aløkwa. Anda kedē, ta

tərdandakwar sem ɲga ndəhay manjar mebərey fa mey aɲga.

¹¹ Ndəhay ma ka kwakwas ɲga Gazlavay na, a kamara sləra ata mandaw mandaw ta melecey. Ata fa hərəm gənaw hay ɲga key kwakwas letək mandaw mandaw a Gazlavay. Ama mebərey gənaw ata ɲgene, a la mebərey da ray ndaw ba sələk.

¹² Ama Kəriste na, ta vəlda ray aɲga la ɲga məcey dey pal amba a mbəkdatara mebərey ɲga ndəhay ɲga sərmataw. Fa dəba ha, ta', a daw a njeɲ a har-zəmay ɲga Gazlavay.

¹³ Fetede, aa manjakaya fa səkwa pas masa Gazlavay ma da pata masa-gəra aɲga hay asi salay aɲga.

¹⁴ Ta tərdəta ndəhay sem maaya fa mey ɲga Gazlavay manjar mebərey ɲga sərmataw, maja aa ma vəlda ray aɲga ɲga məcey. A vəlda ray aɲga ha na, dey pal gway.

¹⁵ *Mesəfnəy ɲga Gazlavay may, ta wuzdan-dakwara cek aha la maaya maaya. Teesed na, aa guzley, a ləvey:

¹⁶ «Bay Mahura a ləvey:

“Ya da jəwey mey ta ata daa dər hay a ɲgene.

*Mejəwey-mey a na, ya da ka

amba kwakwas adaw a njeɲ aa mevel ata, asaya, ya da wuzlala aa ləngesl ata.”»

¹⁷ Fa dəba ha, aa guzley saya, a ləvey:

«Ya fa da wulkey da ray mebərey ata

leŋ da ray sløra ata maaya ba ŋgene na, daa saba.»

¹⁸ Maja ŋgene, da Gazlavay ta mbəkda mebørey ŋga ndaw sem na, mehørey gønaw ŋga mbøkey mebørey na, daa saba.

Mey da ray menğəchey fa Bay Gazlavay ta mevel maaya

¹⁹ Məlma adaw hay, maja mambaz ŋga Yesu ma mbədfwa na, ya gwakwa ŋga mbøzey la aa *Slam masa Gazlavay aa da hwađ a.

²⁰ Ta wurndakwar cəved mawiya la masa ma da handandakwar aa heter mendøvey ba ta fa zana menğərey daa *Way ŋga Gazlavay heyey, anda meløvey, ta fa vaw ŋga *Kəriste masa ma mæcey fa hwadam mazlanğalakaya heyey.

²¹ Ndaw aləkwa mahura da ray ndøhay ma ka kwakwas daa Way ŋga Gazlavay na, daha. Anğa na, *bay-ray ŋga way a.

²² Anda keđe, si ya ŋğəchakwa fa Gazlavay ta mevel maaya, ta metøbey mey ŋga Gazlavay ta mevel pal, ta mevel manjar mebørey, asaya, vaw aləkwa may mapərkaya ta yam masa maaya.

²³ Gazlavay ta løvey la, a da ləhdandakwar. Gazlavay na, a ka cek aha la anda aa ma løvey. Anda keđe, aləkwa fa ləvkwa fa mey ŋga ndøhay tabiya, aləkwa fa təbkwa aa mevel aləkwa cek masa Gazlavay ma løvey a da ka heyey. Mbəkdakwa mewulkey cew cew.

10:19 10.19 4.16; 9.8 **10:20 10.20** zana: 9.3; Mt 27.51; **cəved mawiya:** 2.14-15; 9.14-15; Jan 14.6 **10:21 10.21** 3.6; 4.14
10:22 10.22 Ez 36.25; Ef 5.26 **10:23 10.23** 3.6

²⁴ Aləkwa cəpa si ya jənkwa vaw da wuzlah aləkwa amba ya vəkwa gədan da wuzlah aləkwa nga wufey vaw, asaya, nga key cek maaya.

²⁵ Ya da mbəkdwakwa nga daw aa *mecəmey-ray nga ndəhay nga Yesu anda ndəhay siya ma mbəkdamara na, kəne ba. Ama si ya vəkwa gədan da wuzlah aləkwa ma fəna ma fəna, maja pas masa Bay Mahura ma da sawa na, anga gweegwe cay.

²⁶ Aləkwa taa sərkwakwa la da ray mey masa fara fara. Ama fa dəba ha, da ya kakwa mebərey tesude na, kwa ya hərkwar gənow na, cek mekele nga vəley a Gazlavay nga mbəkey mebərey aləkwa daha daw? Daa ba səlak.

²⁷ Da kəne na, kwa cek mekele nga key daa ba, si mesəkwey sariya ta mandərzay daa dey, sariya masa Gazlavay ma da ka ngaa zəfdata masa-gəra anga hay aa awaw menjem-njem e.

²⁸ Kwa waawa ma rəsa *kwakwas nga Mawiz masa ndəhay cew, da daa ba, ndəhay maakar ma kam sede da ray a la na, a da kəfmara ndaw aha vagay, fa da sərfamar dey-ceceh daa ba.

²⁹ Da anda ngenə na, ka wulkam na, kwara? Ndaw ma rəsa Bəzey nga Gazlavay, ma pa mambaz nga Yesu nga cek nga tede, mambaz nga *Mejəwey-mey Mawiya masa ma pəra mevel anga, asaya, ma cəfa *Mesəfney nga Gazlavay ma wuzdandakwara maaya nga Gazlavay na, Gazlavay a da kada ndaw a na, kwara? A da

sərda banay ta ndaw aha ma fəna ηgene saya.

³⁰ Fara fara, ya sərkwā ndaw masa maa guzley, ma ləvey: «Cek masa ata ma kamiwa maaya ba na, ya pəla la, ya da katar sariya.» Asaya, ndaw a, aa guzley, a ləvey: «Bay Gazlavay a da katar sariya a ndəhay aŋga hay.»

³¹ Da sariya ηga Gazlavay, ndaw masa aŋga daha ta dey ηga sərmatāw, ta təfda ndaw la na, ndaw aha a zəley marava la.

³² Sərfadamara menjey akwar zleezle daa masa akwar ma təbmara ηga njej daa mewedey ηga Bay Gazlavay təlām. Fa dəba ha nekədəy, akwar ta sərām banay la ga, ama akwar ta bəsmara banay a la.

³³ Daa ηgene, ta cəfmata ndəhay siya da wuzlah akwar la fa mey ηga ndəhay ga, ta sərdamata banay la. Ndəhay siya da wuzlah akwar ta dəkmatar mevel la a ndəhay ma cəfmata ha ηgene.

³⁴ Ahaw, akwar ta sərām dey-ceceh la fa ndəhay masa ata ma kəzlamata aa fərsəne maja Yesu. Asaya, daa masa ndəhay fa vama kwara cek akwar hay na, akwar ta mbəkdamatara la ta meesəmey ηga təbmara, maja ka sərmarā akwar ta cek hay maaya mekele ma fəna, ma da njej ηga sərmatāw.

³⁵ Maja ηgene, pamara Gazlavay ηga ndaw akwar fara fara cəŋga, ka da mbəkdamara ba. Da akwar fa kamara kəne na, Gazlavay a

10:29 10:29 2.3; 5.8; 9.12; Mt 12.31 **10:30 10:30** Mew 32.35,
36 **10:32 10:32-34** 6.10 **10:33 10:33** 1Kwr 4.9 **10:34 10:34**
11.26; 13.14

pølkwara mawurbay akwar la ma fəna.

³⁶ Maaya na, ka bəsmara banay cəngga amba ka kam anda Gazlavay ma wudəy, asaya, amba ka hətam cek masa Gazlavay ma ləvey a da vøldakwara heyey.

³⁷ Yaa guzley anda keđe na, maja
«menjey nekədey fedə, fara fara mendərey
nekədey gway,

ndaw ma da sawa heyey na, a sawa la,
aa fa sawa, fa da zənwə vaw daa ba səlak.»

³⁸ Gazlavay aa guzley, a ləvey saya:

«Ndaw adaw maaya na, ara ndaw ma paya
ngə ndaw aŋga fara fara.

Anda keđe, a hətəy heter mendəvey ba la.

Ama da ndaw a vəhey fa dəba na,
ya fa daa səmey da ray a daa ba.»

³⁹ Aləkwa na, səkway ngə ndəhay masa ma vəham sem fa dəba amba aa zədam na, kəne ba, ama aləkwa na, ndəhay ma pamara Gazlavay ngə ndaw ata fara fara. Anda keđe, Gazlavay a ləhdandakwar la.

11

Mepey Gazlavay ngə ndaw fara fara na, a wudəy ngə ləvey kwara?

¹ Mepey Gazlavay ngə ndaw fara fara na, a wudəy ngə ləvey cek masa aləkwa ma səkwakwa fa Gazlavay na, ya sərkwa ya hətakwa la fara fara. Kwa aləkwa ta hətqwar ta dey aləkwa daa ba na, ya sərkwa ara cek fara fara.

² Ara anda keɗe, ndəhay masa zleezle ma pamara Gazlavay nga ndaw ata fara fara. Ara maja ngene, Gazlavay maa həmdata.

³ Aləkwa fa pakwa Gazlavay nga ndaw aləkwa fara fara. Ara maja ngene, ya sərkwā Gazlavay a ləma slam da vad ta slam da hwayak ta fa mey anɗa meeguzley gway. Anda meləvey, cek hay masa aləkwa ma hətatakwar ta dey aləkwa na, Gazlavay a katərwa ta fa cek masa aləkwa ma hətatakwar ta dey aləkwa ba.

⁴ Yaw, *Abel ta pa Gazlavay la nga ndaw anɗa fara fara. Anda keɗe, ta vələr cek la a Gazlavay ta mevel pal ma fəna nga məlmaha *Kayin. Maja ngene, Gazlavay ta təba cek masa anɗa ma vəldara heyey la, a pa nga ndaw maaya fa mey anɗa. Kwa Abel e ta məcey sem na, aa faa guzlndakwar anda aa ta dey cənɗa, maja aa ma pa Gazlavay nga ndaw anɗa fara fara.

⁵ Henakw ta pa Gazlavay la nga ndaw anɗa fara fara. Da ray ngene, Gazlavay a la a vad a cakay a, kwa ta məcey ta məcey daa ba, kwa ndaw ma hətar daa saba. Masa Gazlavay ta la Henakw a daa ba arañ na, Henakw fa kar cek ma mbafar a Gazlavay, anda mawuzlalakaya daa ɗerewel nga Gazlavay.

⁶ Da ndaw ta pa Gazlavay nga ndaw anɗa fara fara daa ba na, ndaw aha fa da kar cek ma mbafar a Gazlavay daa ba. Kwa waawa ma wudɗey nga ngəchey ngada fa Gazlavay nga ɗərey dangay na, si a sərə Gazlavay na, daha,

asaya, si a sɛra Gazlavay fa katar maaya ngada ndɔhay ma sɛpmara.

⁷ Nɔwe ta pa Gazlavay la nga ndaw anɔa fara fara. Maja nɔgene, ta pas masa Gazlavay ma wuzdara cek hay ma da kam ngada fa mey masa kwa ta hɔtatar ta dey anɔa daa ba aran na, Nɔwe he ta jɔkfar slɛmay la a Gazlavay cɛnga. Ta', aa cedey kwambiwal mahura anda way nga lɔhda ray anɔa ta ndɔhay da way anɔa hay. Nɔwe ma pa Gazlavay nga ndaw anɔa fara fara nɔgene na, a wuzdɔrwa ndɔhay siya da bɛla fa pamara Gazlavay nga ndaw ata fara fara daa ba. Anda kedɛ, Gazlavay may, a pa Nɔwe nga ndaw maaya fa mey anɔa.

⁸ *Abɔraham ta pa Gazlavay la nga ndaw anɔa fara fara. Maja nɔgene, daa masa Gazlavay a ma zɛla heyey na, ta jɔkfar slɛmay la. Da ray nɔgene, ta', a daw aa hwayak masa Gazlavay ma lɔvar a da vɛldara heyey. Slam masa anɔa ma daw a hwad a na, kwa ta sɛra fedɛ na, daa ba.

⁹ Abɔraham ta pa Gazlavay la nga ndaw anɔa fara fara, maja nɔgene ta', a daw a nɔjey daa hwayak masa Gazlavay ma lɔvar a da vɛldara heyey, ama anɔa manjakaya anda ndaw-mɛlak. Anda kedɛ, a nɔjey daa way-mekɔrcey. Ata *Izak ta *Jakwap may, Gazlavay a lɔvey a da vɛldatara hwayak a anda aa ma lɔvey a da vɛldara a Abɔraham. Ata may, a njam daa way-mekɔrcey anda Abɔraham a.

¹⁰ Abɔraham na, fa sɛkwa berney masa salay a mapakaya maaya maaya. Ara Gazlavay ta ray

11:7 11.7 MC 6.13-22; Rm 4.3; 1Pi 3.20 **11:8 11.8** MC 12.1-2

11:9 11.9 MC 35.12, 27

aŋga ma pa kwakway nga berney a, asaya, ara aŋga ma ləma berney a.

¹¹ Yaw, Abəraham ta pa Gazlavay la nga ndaw aŋga fara fara. Da ray ŋgene, kwa aŋga maraw, asaya, kwa ŋgwas aŋga Sara aa dərlay na, ta key hwaɗ la cəŋga. Abəraham a səra Gazlavay ma ləvar a da vəlar bəzey heyey na, a mbərzley ba.

¹² Ara anda keɗe, Abəraham, ndaw masa fa səkwey meməcey na, ta yawa bəza hay la, səkway aŋga ta key la ga anda wurzla hay da vad, a sləfam ba anda mawurbay da wayam.

¹³ Ndəhay a keɗe cəpa ta pamara Gazlavay la nga ndaw ata fara fara haa kasl fa meməcey ata. Ata ta hətam cek masa Gazlavay ma ləvey a da vəldatara heyey na, daa ba. Ama a səmra pas pal na, Gazlavay a vəldatara la anda aa ma ləvey a. Da ray ŋgene, ata faa səmam da ray a, taa guzlam la, a ləvam ata na, ata anda mələk hay da bəla keɗe, fa da njam daa ba, kwa hwaray ta katar nga ləvey kəne na, daa ba.

¹⁴ Ndəhay a maa guzlam anda ŋgene na, a wuɗey nga ləvey ata fa səpam hwayak ŋgada ata ray ata.

¹⁵ Ta wulkam da ray hwayak masa ata ma mbəkdamərwa na, daa ba. Da ta wulkam la na, anja a vəham la aa hwayak a saya.

¹⁶ Fara fara a səpam na, hwayak masa maaya, anda meləvey slam da gazlavay da vad. Ara maja ŋgene, Gazlavay ma ləvey, aŋga Gazlavay

ata, kwa hwaray fa da kar nga lövey kõne na, daa ba. Nõka, Gazlavay ta diytar berney maaya la, ba diya?

¹⁷⁻¹⁸ Gazlavay aa guzlar a Abõraham, a lõvar: «Ara ta fa bõza hay nga bõz akah Izak, slõmay akah ma da zõley.» Fa dõba ha, Gazlavay a jada Abõraham a nga võldara bõzey anga mendulen Izak nga hõrey. Abõraham ta pa Gazlavay la nga ndaw anga fara fara, maja ngenene, ta', a la bõzey a, a daw nga hõrara ngada Gazlavay.

¹⁹ Abõraham a sõra Gazlavay na, a gwa nga slõkfdadõrwa ndaw daa memõcey. Anda kedfe, a hõtar bõzey anga Izak na, ara anda a slõkfdawa daa memõcey.

²⁰ Izak ta pa Gazlavay la nga ndaw anga fara fara, maja ngenene, ta', a põstar mey ngada ata Jakwap ta Ezayu da ray cek ma da kam ngada fa mey.

²¹ Jakwap may, ta pa Gazlavay la nga ndaw anga fara fara. Da ray ngenene, daa masa Jakwap a fa da mõcey na, ta põstar mey la ngada bõza hay nga *Jawzef, fa dõba ha, a dõra danḡay fa zlanday anga, a hõlma Gazlavay.

²² Jawzef ta pa Gazlavay la nga ndaw anga fara fara. Maja ngenene, daa masa anga fa da mõcey na, taa guzltar la a ndõhay *Israyel hay, a lõvtar, cay na, a bam la daa hwayak nga *Ejip. Asaya, taa guzltar la da ray cek masa ata ma da kam ta tetesl anga.

11:16 11.16 13.14; Mab 3.6; Mt 22.32 **11:17-18 11.17-18** MC
 21.12; 22.1-14; Jak 2.21 **11:19 11.19** Rm 4.17 **11:20 11.20** MC
 27.27-29, 39-40 **11:21 11.21** MC 47.31-48.20 **11:22 11.22** MC
 50.24-25; Mab 13.19

²³ Ata papan̄ nga *Mawiz ta mamaha ta pamarā Gazlavay la nga ndaw ata fara fara. Anda kedē, daa masa ata ma yamərwa Mawiz a na, ta ḡadamara la ta ḡey kiya maakar da way. A nəkmarā ḡəzey a na, a mbey ara mey ba. Ata na, kwa ta zluram ta mey nga bay Ejip daa ba.

²⁴ Masa Mawiz a ta ḡəley cay na, a wuḡey a zəlmara ḡəzey nga dam nga bay *Farawan̄, bay Ejip ba. A wuḡey nga zəley kəne ba na, maja an̄ga fa pa Gazlavay nga ndaw an̄ga fara fara may.

²⁵ A wuḡey nga sərey banay ta ndəhay nga Gazlavay da ray aa ma da n̄jey nekəḡey daa meesəmey daa mekey meḡərey.

²⁶ A wuḡey na, ndəhay a rəsmara maja *Kəriste, da ray an̄ga ma da ḡətey zleley ga da Ejip n̄gene. A wuḡey kəne na, maja an̄ga fa səkwa mawurbay nga sləra an̄ga masa Gazlavay ma da vəldara n̄gada fa mey.

²⁷ Mawiz ta pa Gazlavay la nga ndaw an̄ga fara fara, maja n̄gene, ta bawa sem daa hwayak nga Ejip. Kwa mevel nga bay da Ejip e fa cey na, ta n̄gene he cəpa, Mawiz ta zlurey daa ba səlāk. An̄ga malacakaya deḡ e anda ta ḡətar Gazlavay la, Gazlavay masa kwa ndaw ta ḡətar ta dey an̄ga daa ba səlāk.

²⁸ Mawiz ta pa Gazlavay la nga ndaw an̄ga fara fara, maja n̄gene, a zlar nga key gwagway mezəley «*Pak». A ləvtar a ndəhay Israyel hay nga wucam mambaz nga ḡənaw fa mey-slam ata hay amba maslan̄ nga Gazlavay masa ma kəḡta

ndəhay vagay a sawa a kəfta bəz ata hay maa-mey-ndaw saba.

²⁹ Israyel hay ta pamara Gazlavay la nga ndaw ata fara fara. Ara maja ngene, daa masa ata ma zləngdamara bəlay magaza na, bəlay a, a wunkey cew, daa cəved' ata na, yam da hwaɸ a daa ba. Ama ndəhay Ejip hay ma səpmatar wurzay ma wudam nga zləngam may na, ta', yam a, a cəmey aa slam a, a bəbətata.

³⁰ Asaya, Israyel hay ta pamara Gazlavay la nga ndaw ata fara fara. Ara maja ngene, ata ma zlərmara mahwal nga berney nga Jerikwaw ɸar maasala, ta', mahwal a, a bəzley.

³¹ *Rahap ngwas-barlaw daha, ta pa Gazlavay la nga ndaw anɸa fara fara may. Maja ngene, anɸa ma təbta ndəhay meslərey masa ma slərdamatərwa nga senɸeley berney a. Ara maja ngene, Gazlavay ta kəɸa vagay anda aa ma kəfta masa-gəra anɸa hay na, daa ba.

³² Yaw, ya daa guzley da ray *Zedeyanɸ, *Barak, *Samsanɸ, *Jefte, *Davit, *Samiyel len ndəhay ma təla mey nga Gazlavay na, kwara sura? Ya fa da hətəy har nɸaa guzley da ray ata pal na, daa ba.

³³ Ata may, ta pamara Gazlavay la nga ndaw ata fara fara, maja ngene, ta fənmata hwayak hay mekele mekele la ta gəɸanɸ daa vəram. Ta kam cek la ta cəved' e anda Gazlavay ma wudəy.

11:28 11.28 Mab 12.1-14 **11:29 11.29** Mab 14.21-29 **11:30 11.30** Jes 6.12-21 **11:31 11.31** Jes 2.11-12; 6.21-25; Mt 1.5; Jak 2.25 **11:32 11.32** NMH 6.11-8.32; 4.6-5.31; 13.2-16.31; 11.1-12.7; 1Sam 16.1**haa** 1Bay 2.11; 1Sam 1.1-25.1

Ta hõtam cek masa Gazlavay ma lõvey a da vøldatara heyey la. Ta gørcamatara mey nga mabar hay la maja a da pøwmata.

³⁴ Ta møcmara awaw masa ma gøðey ta gøðan la. Ta lõham la daa masa fa da køðmata ta dølawa. Ata na, ta tøram la nga masa-bøle hay, ama Gazlavay ta vøltar gøðan la. Ta jaram la daa vøram, ta fønmeta sewje hay ma samawa daa hwayak hay mekele mekele sem ta gøðan.

³⁵ Nğusay may, ta pamara Gazlavay la nga ndaw ata fara fara. Ara maja nğene, ata ma høtmatar ndøhay mamøctakaya fa sløkdamawa daa memøcey.

Yaw, ndøhay siya ta søram banay la ga ta mekøðey haa a møcam. Ama ta wudam nga lõhey daa banay a na, daa ba. A wudam nga møcey daa banay a amba Gazlavay a sløkdadatørwa daa memøcey, a vøltar menjeý masa ma føna da bøla keðe.

³⁶ Ndøhay mekele na, ta bøsmara mecøðey la, ta bøsmara laway la. Asaya, ta jøwmata la ta calalaw, ta gørcamata la aa førsøne. Ama ta nğene he cøpa ta bøsmara la.

³⁷ Siya hay da wuzlah ata na, taa zakamata la ta anğwa vagay, siya hay, ta døslmata la cew cew. Siya hay, ta nğømamata la ta dølawa vagay. Ndøhay siya ta pøkam la saw køne, ata masa-viya hay, a køzlam fa vaw na, zana nga ambal nga døkwa daa ba nga tøban, ta søram banay la ga.

11:33 11.33 NMH 14.6-7; 1Sam 17.34-36; Dan 6.1-27 **11:34**
11.34 Dan 3.23-25 **11:35 11.35** 1Bay 17.17-24; 2Bay 4.18-37
11:36 11.36 Jer 20.2; 37.15 **11:37 11.37** 2Mev 24.21

³⁸ Ndøhay maaya ñgene na, slam da bøla kefe tøfe ñga ñjey ñgada ata ba. Fa pøkam saw da wuzlah-ley, da daa ba, da anġwa, a nam daa bødám hay, da daa ba, daa vøgedf hay anda ndøhay masa ta bølmata sem.

³⁹ Ndøhay a kefe tabiya ta pamara Gazlavay la ñga ndaw ata fara fara. Ara maja ñgene, Gazlavay ma pata ñga ndøhay maaya fa mey anġa. Ama ta høtam cek maaya masa Gazlavay ma løvey a da vøldatara a ndøhay anġa hay heyey na, daa ba.

⁴⁰ Fara fara, Gazlavay ta bøy cek la maaya kalah ñgada aløkwa, amba ta pas masa ta ndøvda sløra anġa cay na, a vøldandakwara cek aha ñgada aløkwa ta ata bama da mey pal.

12

¹ Ndøhay a tabiya ma pamara Gazlavay ñga ndaw ata fara fara ñgene, fa zlørmándakwar ray ñga vølmándakwar gødanġ. Ata fa wuzdaman-dakwara, ya da pakwa Gazlavay ñga ndaw aløkwa fara fara na, ta fa banay masa ata ma bøsmara ñgene. Maja ñgene, hazakadakwa cek hay ma tøkndakwar ñga daw fa mey fa mey cøpa. Hazakakwa ma føna na, mebørey ma tøkndakwar ñga daw fa mey fa mey daa mey ñga Gazlavay. Jarakwa, nakwa fa mey fa mey haa kasl mendøvey a.

² Nøkakwa dey na, si fa Yesu. Ya da mbøkdkwa ba, maja ara anġa ma pandakwara cøvedf ñga løhey, asaya, ara anġa ma

da jəɗndakwar haa mendəvey a. Ta təba la nga kəɗmara fa hwadam mazlanɗalākaya, kwa hwaray ta kar nga məcey daa ba. A təba maja a wulkey a da hətəy meesəmey masa Gazlavay ma ɓadara nga vəldara fa dəba ha. Wure keɗe, anɗa manjakaya ta har-zəmay nga Gazlavay ma wey da ray cek hay cəpa.

³ Ahaw, wulkam da ray Yesu a. Ndəhay malamba hay ta rəsmara la, ta sərdamara banay la, ama ta ɓəsa la cəpa. Anda keɗe, ka da gəram ba, ka da məcmara vaw ba.

Mey da ray mekətəy nga Gazlavay

⁴ Akwar fa kəɗam vaw amba ka kam mebərey ba, ama kwa ndaw pal da wuzlah akwar ta məcey daa mekəɗey-vaw a daa ba aran.

⁵ Akwar fa sərfadamara mey masa Gazlavay ma dəkakwar mevel ta anɗa heyey, ba diya? Gazlavay aa guzlkwar anda aa maa guzltar nɗada bəz anɗa hay, a ləvey:

«Bəz adaw, da yah, Bay Gazlavay,

ya fa sərdaka banay nga kətka na, təba mekətəy a.

Da ya fa mbəɗka ray na, ka da cey mevel ba.

⁶ Maja yah, Bay Gazlavay, ya kətəy na, ndaw masa yah ma wuda.

Ya sərdey banay na,

ta ndəhay cəpa masa yah ma pata nga bəz adaw hay.»

⁷ Gazlavay a sərdakwar banay na, a key a kətqwar. Anda keɗe, Gazlavay a pakwar na,

anda bəz anğa hay. Bəzey masa papaha a kəta ba na, daha daw?

⁸ Gazlavay na, fa kətata bəz anğa hay cəpa. Anda keđe, da aa fa kətkwar daa ba na, nğene akwar bəz anğa hay fara fara ba, akwar bəza hay manjar papaŋ.

⁹ Yaw, papa aləkwa hay da bəla na, fa kətmandakwar, anda keđe, aləkwa fa namatakwar ray. Kaa wara ya nakwar ray a papa aləkwa Bay Gazlavay ma fəna ba na, kwara? Da aləkwa fa nakwar ray na, ya da hətkwa heter mendəvey ba.

¹⁰ Papa aləkwa hay masa da bəla keđe a kətmandakwar nğa menjey nekəđey gway anda mevel ata ma wuđe. Ama papa aləkwa masa da vad na, a kətndakwar nğa dıyndakwar amba ya təkwa ndəhay anğa hay maaya anda anğa nğa sərmataw.

¹¹ Daa masa Gazlavay fa kətndakwar na, a mbafandakwar ba, a candakwar mevel. Ama, ndəhay ma təbmara mekətey a na, a hətam menjey maaya la ta zazay fa dəba ha.

Ndəhay nğa Gazlavay a da njam na, kwara?

¹² Anda keđe, ka da məcmara vaw ba, kam gədaŋ nğa daw fa mey fa mey.

¹³ Maaya na, ka səpmara cəved nğa Gazlavay dər e amba ndəhay siya da wuzlah akwar masa-bəle hay a mbəkdamara mey nğa Gazlavay ba, a səpmara Gazlavay maaya maaya.

12:7 12.7 Mew 8.5 **12:10 12.10** Mt 5.48; Rm 5.2; Jak 3.17
12:11 12.11 12.14; Jak 3.17-18 **12:12 12.12** Iz 35.3 **12:13**
12.13 MM 4.26

¹⁴ Səpam nga njeý ta zazay ta ndəhay tabiya, kam gədan amba ka kam cek ma mbafar a Gazlavay, da daa ba na, kwa ndaw fa da hətər Gazlavay ta dey anğa daa ba.

¹⁵ Wam vaw, kwa waawa da wuzlah akwar a da mbədar dəba a Gazlavay masa fa wufndakwar kalah keđe ba. Asaya, wam vaw amba kwa waawa da wuzlah akwar a tərey anda slaslalay nga wudez masa meedəwek e * ba, da daa ba na, a da pey har, a da nəsta ndəhay siya ta dēdəwek anğa ha.

¹⁶ Wam vaw, kwa waawa da wuzlah akwar a da key cek malamba ba, a da rəsa cek maaya nga Gazlavay anda Ezayu ba. Ezayu a na, ta ləvar la a məlmaha mecəhe nga key mahura da ray a amba a vəlar cek mezəmey gway.

¹⁷ Ka səmərə fa dəba ha, Ezayu ta wufey la amba papaha a pəsar mey cəngə, haa a səpa mepəsey-mey a ta matəway daa dey. Ama papaha ta pəsar mey daa saba, maja Ezayu a gwa nga mbədda cek maaya ba masa anğa ma ka heyey saba.

¹⁸ Səmərə, daa masa *Israyel hay ata da wuzlah-ley na, ata ta ngəcham la a cakay anğwa nga Sinay, cek masa ndaw ma gwa nga gəsfar. Ama akwar na, ka ta ngəcham a cakay cek masa ndaw ma gwa nga gəsfar anda Israyel hay

12:14 12.14 12.11; Mk 12.30-31; Ps 34.15; 1Kwr 7.15 * **12:15** 12.15 slaslalay nga wudez masa meedəwek e: Mey a keđe a patar lenğesl a ndəhay da ray mesəpey kuley hay. (Nəka Mew 29.17.) Ndəhay siya hay a wulkam mey a keđe a wufey nga ləvey mepey mey aa mevel. **12:15 12.15** Mew 29.17; Gal 1.6 **12:16 12.16** MC 25.29-34 **12:17 12.17** MC 27.30-40

zleezle na, daa ba. Daa ray nga anɗwa ha na, awaw fa gɔfey njem! njem! da ray a, lɔvanɗ bɛk-bek asaya, bɛrgadanɗ fa key ta gɔdanɗ da ray a.

¹⁹ Asaya, daa anɗwa ha na, taalam fa cɛnwa, ɗay fa cɛnwa. Israyel hay a ma cɛndamara na, a tɔwam, a wudam amba Gazlavay aa guzltar saba,

²⁰ maja mey masa ata ma cɛndamara na, a fɛntar gɔdanɗ. Gazlavay aa guzltar, a lɔvtar: «Kwa ndaw, kwa cek nga ley ma gɔsfar fa anɗwa ha na, hazakamara ta anɗwa haa a mɛcey.»

²¹ Cek masa ata ma hɛtmar a na, ta zluradata sem kalah. Kwa *Mawiz may, aa guzley, a lɔvey: «Ya faa wesey maja mandɔrzay fa kaya.»

²² Ama akwar na, ka ta nɗɔcham la aa anɗwa nga *Siyanɗ, aa berney nga Gazlavay, Gazlavay ndaw masa anɗa daha ta dey nga sɛrmataw. Berney a na, ara *Jeruzelem masa da gazlavay da vad. Fetede maslanɗ hay nga Gazlavay makustakaya ga, a slɛfam ba, fa kam gwagway.

²³ Asaya, akwar ta nɗɔcham la a cakay bɛza hay nga Gazlavay masa maa-mey-ndaw † makustakaya fetede may. Bɛza hay a na, ara ndɔhay masa Gazlavay ma wuzlalatara mezɔley ata sem aa ɗerewel anɗa. Ata fa kam gwagway da vad may. Akwar ta nɗɔcham la a cakay Gazlavay, Gazlavay masa ma katar sariya a ndɔhay da bɛla tabiya. Akwar ta nɗɔcham la a cakay ndɔhay

12:18 12.18-19 Mab 19.16-22; 20.18-21 **12:20 12.20** Mab 19.12-13 **12:22 12.22** 13.14; Gal 4.26; CWJ 5.11; 21.2 † **12:23 12.23** bɛza hay nga Gazlavay masa maa-mey-ndaw: Ara ndɔhay tabiya ma tɛba mey nga Yesu manjatakaya da cakay Gazlavay.

masa ma kam sløra ta cøved e ma tøram maaya kalah fa mey nga Gazlavay.

²⁴ Akwar ta ngøcham la a cakay Yesu, ndaw masa ma mbøddørwā mambaz anga amba ya tøkwa ndøhay maaya fa mey nga Gazlavay. Yesu a na, ara ndaw ma handørwā *Mejøwey-mey Mawiya masa Gazlavay ma jøwā ta aløkwa. Mambaz masa anga ma mbøddørwā na, a wuzwa cek maaya ma fønā cek masa mambaz nga *Abel † ma wuzdørwā.

²⁵ Anda keðe, wam vaw, jøkfamar slømay a ndaw masa maa guzlkwar, ka da mbøðmar døba ba. Zleezle na, ndøhay ta jøkfamar slømay a ndaw ma wuzdatara mey nga Gazlavay da bøla keðe daa ba. Ara maja ngenē, Gazlavay ma sørdara banay ta ndøhay a. Aløkwa masa fa cøndakwa ðay nga Yesu, ndaw maa guzlnakwar ta da vad keðe, da ya jøkfakwar slømay ba na, kaa ya da løhkwa daa banay a kwara?

²⁶ Zleezle na, ðay nga Gazlavay ta cønwa la, hwiyak ta wusey la. Ama wure keðe, Gazlavay aa guzley da ray cek masa aa ma da ka, a løvey: «Ya wusa hwiyak la dey pal saya. Ya da wusey na, hwiyak daada ba, ama slam da gazlavay da vad may.»

12:23 12.23 Lk 10.20 † **12:24 12.24** Mambaz nga Yesu a fønā nga Abel na, kwara? Ndøhay siya a løvam mambaz nga Yesu na, a wuzwa dey-ceceh ta mewuðfey-vaw nga Gazlavay, ama mambaz nga Abel na, a wuzwa Abel ma wuðfey nga køðey ndøhay malamba hay. Ndøhay siya a løvam mambaz nga Yesu a fønā mebørey ta gøðan. **12:24 12.24** 8.6; 9.12; Abel: MC 4.10.

12:25 12.25 6.4-6; 8.1; Mab 20.22 **12:26 12.26** Mab 19.18; Hag 2.6, 21

²⁷ Mey masa ma lõvey «dey pal saya» a wuzwa cek hay tabiya masa Gazlavay ma katərwa na, a wusam la. Asaya, cek hay a, aa zədfam la. A ka kəne amba cek hay masa ma wusam ba na, aa zədfam ba, a njam kəne.

²⁸ Anda kefe, kakwar suse a Gazlavay maja aa ma vəndakwar berney masa ma pəlhey ba, slam masa Gazlavay fa wey da ray ndəhay anğa hay nğa sərmataw. Kakwar cek masa ma mbafar, nakwar ray.

²⁹ Sərmara, Gazlavay masa aləkwa ma həlmakwa na, anğa anda awaw maa wurey cek.

13

Mey da ray menjey maaya nğa ndəhay nğa Gazlavay

¹ Akwar ndəhay nğa Gazlavay, wuɖam vaw da wuzlah akwar cənğa anda akwar məlman hay.

² Anda kefe, sərfadamara nğa təbey məlak hay a way akwar hay ta meesəmey. Ndəhay mekele ta təbam məlak hay la kəne, anja a təbam na, maslan hay nğa Gazlavay, kwa ta sərmara daa ba.

³ Wulkam ta ndəhay daa fərsəne, anda akwar bama ta ata daa fərsəne he may. Asaya, wulkam ta ndəhay masa fa sərdamata banay, anda akwar may, fa səram banay bama ta ata.

12:28 12.28 13.14 **12:29 12.29** Mew 4.24 **13:1 13.1** 6.10; 10.24; 13.16; 1Pi 1.22 **13:2 13.2** MC 18.1-8; 19.1-3; Jəw 31.32; Rm 12.13; 1Tm 3.2; 5.10; 1Pi 4.9; 3Jn 8 **13:3 13.3** 10.34; Mt 25.36

⁴ Kwa waawa nga jøkey slømay fa mey masa Gazlavay ma løyey da ray meley ngwas. Anda kede, kwa waawa a da ley vaw saw da palah ba. Sørnara, Gazlavay a katar sariya la ngada ndøhay ma lam vaw saw da palah ta ngada ndøhay ma kam cek hay malamba.

⁵ Kwa waawa a da wulkey kalah da ray dala ba. Sasømam ta cek masa da har akwar gway, maja Gazlavay ta ray anga taa guzley la, a løyey: «Ya fa da mbødka døba daa ba. Kwa ya fa da mbøkdaka daa ba.»

⁶ Anda kede, kwa waawa da wuzlah aløkwa a gwa nga løyey ta mandørzay daa dey daa ba:

«Bay Gazlavay na, ara ndaw ma jønya.

Maja ngene, ya fa da zlurey kwa ta meeme daa ba,

maja ndaw ma gwa nga kaya cek maaya ba na, daa ba.»

⁷ Wulkam ta *bay-ray akwar hay daa *mecømey-ray nga ndøhay nga Yesu masa ma wuzdamakwara mey nga Gazlavay zleezle. Yaw, wulkam da ray menjey ata, asaya, da ray memøcey ata. Pamara Gazlavay nga ndaw akwar fara fara anda ata.

⁸ Yesu *Køriste na, a mbøfey ba døga zleezle haa wure kede, anga daha nga sørnataw.

⁹ Wam vaw maja ndøhay faa sørkadamata ndøhay ta meesørkey mekele mekele masa wal ta meesørkey masa fara fara nga Gazlavay. Ndøhay a ngene, a da zlanğadadamakwar ta

meesərkey ata da ray mesəpey kwakwas da ray cek mezəmey. Ama kwakwas da ray cek mezəmey a na, kwa ta jənta ndəhay masa ma səpmara kwakwas a na, daa ba səlak. Anğa maaya amba ndəhay a hətam gədan daa cəved nğa Gazlavay ta fa maaya nğa Gazlavay, da ray mesəpey kwakwas da ray cek mezəmey.

¹⁰ Aləkwa na, ta slam aləkwa mefəkey cek * nğada Gazlavay, ama ndəhay ma ka kwakwas nğa Gazlavay ata ta cəved nğa zəmey cek da ray slam aha daa ba.

¹¹ Ata na, a həram gənaw. *Ndaw mahura da ray ndəhay ma ka kwakwas nğa Gazlavay na, a mbəzey ta mambaz a aa *Slam masa Gazlavay aa da hwaɗ a nğa vəldara a Gazlavay nğa mbəkey mebərey nğa ndəhay. Aslaw a na, a badamara ta cakay, aa wurmara fetede.

¹² Yesu na, kəne may, a da kəɗmara na, ta', a badamara la daa berney nğa *Jeruzelem ta cakay. A sərey banay anda ngene na, amba a tərdata ndəhay nğa ndəhay maaya manjar mebərey ta fa mambaz anğa.

¹³ Da anda kedde na, ya da səpkwa kwakwas nğa *Jəwif hay saba. Bakwa la ta cakay, nakwa fa Yesu amba a pamandakwar hwaray bama ta anğa.

¹⁴ Da bəla kedde na, aləkwa manjatakaya daa berney masa ma da njey nğa sərmataw ba, ama

13:9 13.9 Rm 14.2; Kwa 2.20-22; 1Tm 4.3 * **13:10 13.10** slam aləkwa mefəkey cek: Fede a wudey nğaa guzley da ray Slam masa Gazlavay aa da hwaɗ a da vad. Ara slam masa Kəriste ma mbəzey a hwaɗ a. **13:11 13.11** 9.7; Lev 16.27 **13:12 13.12-13** 11.26; Mt 27.31-33

ya sɔpkwa ta sɔpey na, berney masa Gazlavay ma da lɔma ngada fa mey.

¹⁵ Anda keɔe, kakwa suse a Gazlavay mandaw mandaw ta mezɔley nga Yesu. Mekey suse a ngene na, ara anda cek mevɔley ngada Gazlavay ma bawa da mey alɔkwa nga hɔlma.

¹⁶ Maaya na, ka kam cek masa maaya da wuzlah akwar, asaya, ka jɔnam vaw. Mekey cek anda ngene na, ara anda mevɔley cek masa ma mbafar a Gazlavay.

¹⁷ Maaya na, ka namatar ray a bay-ray akwar hay, ka cɔnmatar mey. Ara ata ma nɔkfamakwar dey daa menjey akwar, maja Gazlavay a daa cɔfɔdata da ray slɔra ata masa ata ma kamara ngada akwar. Anda keɔe, da akwar fa namatar ray na, a kamara slɔra ata la ta meesɔmey, da daa ba na, har a da rɔwtar. Da har ta rɔwtar sem na, ngene, fa da jɔnkwar daa ba sɔlak.

¹⁸ Ambahw, dɔram dangay a Gazlavay maja ala. Ya sɔmara fara fara, mevel ala maaya, ya wudam nga key cek ta cɔved e mandaw mandaw.

¹⁹ Yaa cɔfɔdakwar kalah na, nga dɔrey dangay a Gazlavay amba a vɔlya cɔved nga vɔhey fa akwar wure keɔe.

Mepɔsey-mey

²⁰ Ara Gazlavay ma vɔlndakwar zazay. Ara anɔa ma slɔkɔfadɔrwa Bay alɔkwa mahura Yesu

13:14 13.14 11.9-10, 13, 16; 12.22, 28; Fɔl 3.20; 2Kwr 5.6; 1Pi 2.11; CWJ 21.2 **13:15 13.15** Ef 5.19-20; Ps 50.14, 23 **13:16 13.16** Gal 6.10; Fɔl 4.18 **13:17 13.17** Ez 3.17; SNM 20.28-31; 1Kwr 16.16 **13:18 13.18** 10.22; Rm 15.30; 2Kwr 1.12; SNM 24.16

da wuzlah ndohay maməctakaya. Yesu a na, ta terey la anda mecəkwer aləkwa mahura ma nekəfandakwar dey, maja anga ma məcey maja aləkwa. Ta fa mambaz anga ma mbədfwa na, Gazlavay ta jəwey mey la ta aləkwa nga sərmataw.

²¹ Anja Gazlavay nga vəkwar gədan amba ka kam cek tabiya maaya anda aa ma wudəy. Anja nga ka sləra anga ta aləkwa ta gədan nga Yesu *Kəriste, amba ya təkwa ndohay maaya fa mey anga. Anja ndohay nga həlmamara nga sərmataw. *Amen.

Mey nga madagway-dakw

²² Məlma adaw hay, ya fa kakwar ambahw, təbmara mey adaw masa ma da vəkwar gədan daa leeter kede ta meesəmey. Leeter kede na, aa zazam daa ba.

²³ Yaw, ya wudəy nga wuzdakwara, məlma aləkwa Timawte na, ta bawa cay daa fərsəne. Da ta wuswa la fiyaw fede na, ya da diyam cew e fa akwar.

²⁴ Camatar har a *bay-ray akwar hay ta a ndohay nga Yesu fetede tabiya may. Məlma aləkwa hay daa *mecəmey-ray nga ndohay nga Yesu daa hwayak nga Itali a camakwar har may.

²⁵ Anja Gazlavay nga pəkwar mey, akwar tabiya ndav.

13:20 13.20 zazay: 12.14; Rm 5.1; 2Kwr 13.11; *mejəwey-mey*: 8.6; *mambaz*: 9.12 **13:21 13.21** Ef 2.10; Fəl 2.12-13 **13:23 13.23** Timawte: 1Kwr 4.17 **13:25 13.25** Gal 6.18

Mofu-Gudur
The New Testament in the Mofu-Gudur language of
Cameroon: Mejəwey-mey Mawiya
Le Nouveau Testament en langue Mofu-Gudur
(Cameroun)

copyright © 2007 Wycliffe Bible Translators, Inc.

Language: Mofu-Gudur

Contributor: Aramaic Bible Translation, Inc.

All rights reserved.

2025-05-14

PDF generated using Haiola and XeLaTeX on 14 May 2025 from source
files dated 14 May 2025

2b021919-36cf-59da-a35f-10c5e5548811